

250.53
136
15

義寧州志

三十卷上
藝文志
歷朝詩
詞附

冊五十

義寧州志卷第三十上

藝文

詩

唐

得日觀東房

即旌陽觀

尚書李質公幹

曾入桃源路桃源信少雙洞霞標素練壁蘚畫陰窻古木疑撐月危峯欲墮江自吟空向寂誰與倒秋江

石潭院

即禪濟寺

僧栖蟾

大順中人

灘聲依舊水溶溶岸影參差對梵宮楚樹七迴凋茂葉江人兩至宿秋風蟾蜍竹老搖疎魄菡萏池乾落翠紅多謝支郎念行止晚年生計亦如蓬

過黃龍呈超慧禪師

呂崑

洞賓

義寧州志

卷三十上

藝文詩

三百四十

鐵牛耕地種金錢刻石兒童把貫穿一粒粟中藏世界半升鑊內煮山川白鬚老子眉垂地碧眼胡僧手指天欲向個中還會得此元元外更元元
棄却飄囊撼碎琴於今不煉汞中金一朝悟得黃龍法始覺平生枉用心

宋

孝宗皇帝題畫冊

黃冠翠帔玉為姿何處春風一見之未到湘江清絕地試看

山谷老人詩

式古堂畫考

度宗皇帝贈太師章石溪壽

石溪名漢章

閭苑仙翁福壽遐欣惟皓首戴宮花文章紫殿無雙士富貴皇朝共一家三代姓名光上國重熙宰輔冠中華鳳凰池畔

標餘慶他日新隄又築沙

送秘監張牧知分寧

司馬光

君實

百里大夫官不輕莫嗟頭上髮垂星人生穀祿偏宜晚世路
艱難莫厭經數曲秋江縈縣白幾峯霽色入簾青于公向日
多陰德已有鷓鴣在漢庭

以雙井茶贈范景仁

春睡無端巧逐人驅訶不去苦相親欲憑洪井真茶力試遣
刀圭報谷神

雙井茶

歐陽修

永叔

西江水清江石老石上生茶如鳳爪窮臘不寒春氣早雙井
芽生先百草白毛囊以紅碧紗十斤茶養一两芽長安富貴
五侯家一啜猶須三日誇寶雲日鑄非不精爭新棄舊世人
義寧州志

卷三十上

藝文詩

二

四百二十五

情豈知君子有常德至寶不隨時變易君不見建溪龍鳳團
不改舊時香味色

逸老亭

蘇舜欽

子美

修水崩騰落雲端傾入羣山自縈轉山迴水抱三百里邑號
西安俯十澗四時夾澗花濛濛數步行人不相見但聞千軍
萬馬橫陣來石激驚湍自相濺忽然瀰漫為平川遠近人家
壓深淺其間有亭號逸老山水之間為勝選黃氏有子樂其
親締葺之勤由富繕蓋憂高年厭家事竭力營此欲自遣親
意雖知風物佳豈若有子常在眼君胡飄飄事遠遊手龜面
薰兩足趼故鄉不到已逾年又非跼踖牽仕宦何如輕舟早
還家日對雲山奉遊燕

輦下會里人子蒙飲

子蒙進士
莫景字

邑人

黃

庶

亞夫

秋風吹客衣歸思入夢寐相逢在千里一飲勝百醉果脯隨
分列不減到家味平生金石心顛倒獨莫棄何時不搔首共
話醫國計恨未得杞梓欲把斤斧試塵埃鞋履穿各走車馬
地唯茲栖栖懷酒椀可以慰

憶竹亭

蓬萊

疑當作革

楚山底傍舍竹四圍狂鞭入門戶亂笋爭牆籬與

竹事往還相對一束書壯長走世路駑駘強鞭答塵埃客灞
漣遠夢夜夜歸小亭久不理漏棟生白芝偶放簿書筆杖履
改舊詩呼童誅蒿萊掃灑莓苔基誰庭無花卉憎有兒女姿
獨移蒼烟本慰我千里思坐生山林趣亭園有光輝免使清
風來留在桃李枝月明遠竹步撚挽頤頷髭相向若知己動
搖影參差人間欠葑石稚乳驕羗夷青衫汗汗垢寸尺莫可
義寧州志

卷三十上

藝文詩

三 五百二十五

裨忍作倉廩盜寧老詩書饑養笋為釣竿早晚耕蒿藜

謝劉簿李尉見訪

詩書卧蓬華柴門晝方開邑官劉與李馬蹄破蒼苔林居厭
龜黽喜振敝席埃見此六翮姿茅荆共徘徊我欲駐車轍蔬
果傾舊醅山花恨未饒無以助酒盃今古飽夜話痛飲勝百
迴春風旌旆滿匏瓜去難陪

席上賦別南宮希元

希元淮上南宮觀字

十年眯車塵思歸入夢寐晨興見家山兩目如去翳故人又
過我相對有餘意當罇話舊遊強笑復吁歎君名在鄉書捧
檄不肯去高堂媿白髮有淚落鞭轡里人獻吉夢四壁衆所
義我喜先子言在耳若龜筮人生老聚散酒薄滿莫避相見
意最長強飲不能醉

家僮來持雙井芽數數飲之輒成詩以示同舍

我疑醇釀千古味寂寞散在山茶枝雙井名入天下耳建溪
春色無光輝吾鄉茶友若敵國糞土尺壁珍刀圭嗟予奔走
車馬跡塵埃荆棘生疾頤煮雲為腴不可見青泉綠樹應相
嗤長鬚前日千里至白芽包裹林巖姿開緘春風若滿手喜
氣收拾人恐知江南陽和夜欲試小齋獨與清風期石鼎泉
甘火齊得混沌不死元氣肥詩書坐對為客主一啜已見沉
澁醅通宵安穩睡物外家夢欲遣不肯歸不信試來與君飲
洗出正性還肝脾

寄子蒙授常寧令

疎率君堪愛無心宦又高身思眠白屋人勉着青袍號隱疑
名福貪歸似姓陶常寧邑雖小應合得牛刀

義寧州志

卷三十一上

藝文詩

四

四百二十

教繩權學書偶成

文字有緣曾弄墨見來官小免咨嗟喜將筆硯傳生計不失
詩書作世家字識姓名能指點寫因梨栗不傾斜着鞭莫落
時人後三十塵埃監汝爺

怪石

山精水怪着薜荔天祿辟邪眠莓苔鈎簾坐對心語口曾見
漢唐池館來

放隱齋落成寄魯直九姪

有序

邑人黃序

祖善

老伯行年七十有六同時兄弟名滿四海墓木已拱合令
老夫老更狂耳近築亭馬鞍山松聲泉溜足以忘年魯直
九姪為我乞詩朝中諸公要驚山祗突兀出聽
直木皆先伐輪囷却歲寒時霑病者粟倒着掛時冠人樂觀

魚尾山齋跨馬鞍朝中乞佳句留與子孫看

石潭院次栖蟾禪師韻

邑人黃庶夷仲

一鉢誰知去住空前朝遺事寄禪宮孤吟盤礴數行墨古意
淒涼四壁風遊客落帆頻上下荒庭疎木幾青紅有人會得
詩中趣日月遊來亦轉蓬

石潭院次栖蟾禪師韻

學士蔣之奇穎叔

瀟灑溪山處何年有梵宮淒涼驚節物搖落又秋風庭柏凌
烟碧林花泣露紅箇中能悟入何必嘆飄蓬

磨劍池

聞說旌陽舊築壇故浮修水一來看至今磨劍池猶在冷浸
一天星斗寒

旌陽山

邑人余良弼成國

義寧州志

卷三十上

藝文詩

五
四百

萬古嵯峨鎮治東下臨無地上摩空雨餘翡翠清光異烟散
芙蓉秀色同元豹隱時香霧合玉龍降處太陽烘尋仙莫道
無真跡瑤草琪花有路通

訓子

白髮無憑吾老矣青春不再汝知乎年當弱冠非童子學不
成名豈丈夫幸有明窓并淨几何須鑿壁與編蒲功成欲自
殊頭角記取韓公訓阿符

分寧絕句

分寧彭思永季長

爭利爭名日日新滿城車馬九衢塵一聲雞唱千門曉誰是

高眠無事人宋詩

弔徐德占并序

蘇軾東坡

余初不識德占但聞其初為呂惠卿所薦以處士用元豐

五年三月偶以事至蘄水德占聞余在傳舍惠然見訪與之語有過人者是歲十月聞其遇禍作詩弔之

美人種松柏欲使低映門栽培雖易長流惡病其根哀哉歲寒姿骯髒誰與論竟為名所誤不免刀斧痕一遭兒女汚始覺山林尊從來覓棟梁未免傍籬籬南山隔秦嶺千樹龍蛇奔大厦若畏傾萬牛何足言不然老巖壑合抱枝生孫死者不可悔吾將遺後昆

次韻黃魯直嘲小德小德魯直子其母微故其詩云解著潛夫論不妨無外家

進饌客爭起小兒那可涯莫欺東方星三五自橫斜名駒已汗血老蚌空泥沙但使伯仁長還與絡秀家

和魯直送雙井茶

義寧州志

卷三十一上

藝文詩

六

四百五十

江夏無雙種竒茗汝陰六一誇新書磨成不敢付童僕自看雪湯生璣珠列仙之儒瘠不腴只有病渴同相如明年我亦東南去畫舫何妨宿太湖

贈山谷子相

黃童三尺世無雙筆頭滾滾懸秋江不憂老子難為父平生倔強今心已一作降我來喜共阿戎語應敵縱橫如急雨生子還如孫仲謀豚犬謾多何足數黃家小兒名拾得眉如長松眼如漆只今數歲已動人老人留眼着他日羨君老蚌生明珠自笑此物吾家無君當置酒我當賀有兒傳業更何須

杏苑亭

繁花影浸碧波紅苑似桃源勝境中不獨杏壇春晝永斯亭今亦繼遺風

奉答元明 元明黃大臨字

蘇轍 穎濱

故人散聚霜前葉往事渺茫風際烟游宦一生非有已隱居
萬事不由天崎嶇檻穽方謀食嘯傲山林肯計年賴已將心
問盧老相逢他日笑風顛

寅菴四首寄弟魯直

邑人 黃大臨 元明

一溪婉婉如平篆四野青青似畫圖仙客放船迷洞府化人
携袂到清都山中安用名丞相天下於今得廣居我即其間
創宮室預愁帝夢有華胥

山前有路到華胥下即乾坤極海隅西接洞庭開曉楚東傾
彭蠡浸晴吳四時更代觀形化萬物推移見尾閭此世人人
少閒暇每携樽酒自看書

手把齊民種時書莎衫篋笠事耘鋤夏栽醉竹餘千箇春糞
義寧州志 卷三十上 藝文詩 七 四百五十

辰瓜滿百區早秫旋春嘗麩蘗新梁炊熟自樵蘇日西杖屨
行山口招得鄰丁作飲徒

招得鄰丁作飲徒山家殺菽蓋胥疎就根煨筍連黃籜和蒂
裁瓜帶綠鬚羹熟澤中親射鴈膾成溪上自罾魚遠懷羊仲
開三徑能似林間今日無

奉寄子由

鐘鼎功名淹管庫朝廷翰墨寫風烟遙知道院頗岑寂定是
壺中第幾天歷下笑譚漫一夢江南消息又餘年動心忍性
非無意吏部如今信大顛

溪上吟 有序 時年十七

黃庭堅

春山鳥啼新雨天霽汀草怒長竹篠交陰黃子觀魚於塘
下尋春於小桃源從以溪童稚子畦丁三四輩茶鼎酒瓢

淵明詩編雖不命戒未嘗不取諸左右臨滄波拂白石詠
淵明詩數篇清風為我吹衣好鳥為我勸飲當其謬然無
所拘繫而依依規矩準繩之間自有佳處乃知白蓮社中
人不達淵明詩意者多矣過酒肆則飲亦無量也然未始
甚醉蓋其所寓與畢卓劉伶輩同而自謂所得與二子異
人亦殊不能知之也酒酣得紙書之為溪上吟

短生無長期聊假日婆娑出門望高邱拱木蔓春蘿試為省
鬼錄不飲死者多安能如南山千歲保不磨在世崇名節飄
如赴燭蛾及汝知悔時萬事蓬一窠青青陵陂麥妍暖亦已
花長烟淡平川輕風不為波無人按律呂好鳥自和歌杖藜
山中歸牛羊在陂陀本自無廊廟政爾樂澗阿念昔揚子雲
刻意思孟軻狂夫移九鼎深巷考四科亦有好事人時能載
義寧州志

卷三十上

藝文詩

八 五百

酒過無疑舉爾酒定知我為何

詠清水巖寄郭明叔知縣

并序

清水巖為天下勝處去縣庭才二十里一山空洞如覆青
玉盞也寒泉在其間甚壯急至巖口復流入石鼻中巖下
有石鐘鼓磬其聲清越不徹滾滾跑跑能驚動人世間金
革聲亦不足道也巖前平行畧可坐千人不審旌旆嘗因

公事一遊否

嘗聞清水巖空洞極明好虎狼仙部曲鐘鼓天擊考雲生卧
龍石水入煉丹竈有意携管絃山祇應灑掃
西安封域中清水巖泉好金堂茂芝朮仙吏書勲考桃源人
已往千古遺井竈雙鳧能來遊俗子迹可掃

答余洪範

倒海弄明月伐山茹芝英婆娑一世間浩蕩懷友生佳人貂
襜褕眉宇秋江晴胸懷府萬物器識謝羣英贈我白雪絃此
意少人明別離數弦望相思何時平猶憶把樽酒夜談盡傳
更

過家

絡緯聲轉急田車寒不運兒時手種柳上與雲霄近舍傍舊
傭保少換老欲盡宰木鬱蒼蒼田園變畦畛招延屈父黨勞
問走婚親歸來翻作客顧影良自哂一生萍託水萬事雪侵
鬢夜闌風隕霜乾葉落成陣燈花何故喜大是報書信親年
當喜懼兒齒欲毀亂繫船三百里去夢無一寸

上冢

自公返蓬華稅駕上邱壟霜露此日悲松楸十年拱養雛數
義寧州志

卷三十一

藝文詩

九

四百四十一

毛羽初不及承奉康州斷腸猿風枝割永痛少年不如人登
仕無前勇髮疎齒牙搖鯨波怒號洵願為保家子敢議世輕
重稱觴太夫人魚菜贍庖供

代書寄翠巖新禪師

山谷青石牛自負萬鈞重八風吹得行處處是日用又將十
六口去作宜州夢苦憶新老人是我法梁棟信手斫方圓規
矩一一中遙思靈源叟分坐法席共聊持楚狂句往作天女
供嶺上早梅春參軍慙獨弄

以雙井茶送蘇子瞻

人間風日不到處天上玉堂森寶書想見東坡舊居士揮毫
百斛瀉明珠我家江南摘雲腴落磴霏霏雪不如為公喚起
黃州夢獨載扁舟向五湖

和答子瞻

一月空迴長者車報人問疾遣兒書翰林貽我東南句窓間
默坐得元珠故園溪友膾腹腴遠包春茗問何如玉堂下直
長廊靜為君滿意說江湖

以雙井茶送孔常父

校經同省並門居無日不聞公讀書故持茗椀澆舌本要聽
六經如貫珠心知韻勝舌知腴何似寶雲與真如湯餅作魔
應午寢慰公渴夢吞江湖

答黃冕仲索煎雙井并簡揚休

冕仲名裳

江夏無雙乃吾宗同舍頗似王安豐能澆茗椀煎菰我風袂
欲把浮邱翁吾宗落筆賞幽事秋月下照澄江空家山鷹爪
是小草敢與好賜雲龍同不嫌水厄幸來辱寒泉湯鼎聽松
義寧州志

卷三十一

藝文詩

十 四百七十

風夜堂朱墨小燈籠惜無纖纖來捧椀惟倚新詩可傳本

寄上叔父夷仲三首

少年有功翰墨林中歲作吏幾陸沉庖丁解牛妙世故監市
履稀知民心萬里歸來兒女瘦十月山行冰雪深夢魂和月
繞秦隴漢節落毛何處尋

艱難聞道有歸音部曲霜行壁月沉王春正月調玉燭使心
萬里朝天心頗令山海藏國用乃是縣官恤民深經心隴蜀
封疆守必有人材備訪尋

闕寒塞雪欲嗣音燕鴈拂天河鯉沉百書不如一見面幾日
歸來兩慰心弓刀陌上望行色兒女燈前語夜深更懷父子
東歸得手種江頭柳十尋

次韻叔父臺源歌

臺源叔父
襄所居處

吾家叔度天與閑晚喜著書如漆園臺平舊基水發源但聞
淙淙下林巒一朝斬木見萬象杳落雲夢胸中寬漱滌泥沙
出山骨混沌鑿竅物狀完茶甘酒美汲雙井魚肥稻香派百
泉暑風披襟看菡萏夜月洗耳聽潺湲時從甥姪置樽俎此
地端正朝諸山除書謗書兩不到紫烟白雲深鎖關鄉人訟
爭請來決到門懷慙相與還呼兒理瑟蕩俗氣果在巢由李
孟間

還家呈伯氏

去日櫻桃初破花歸來着子如紅豆四時驅迫少須臾兩鬢
飄零成老醜永懷往在江南日原上急難風雨後私田苦薄
王稅多諸弟號寒諸妹瘦扶將白髮渡江來吾二人如左右
手苟從祿仕我還回且慰家貧兄孝友強趨手板汝陽城更
義寧州志 卷三十上 藝文詩 十一 五百一十
責愆期被訶詬法官毒螫草自摧丞相霜威人避走賤貧孤
遠蓋如此此事端於我何有一囊粟麥七千錢五人兄弟二
十口官如元亮且折腰心似次山羞曲肘北窓書冊久不開
筐篋黃塵生鎖鈕何當畧得共討論况乃雍容把杯酒意氣
敷腴貴壯年不早計之且衰朽安得短船萬里隨江風養魚
去作陶朱公斑衣奉親伯與儂四方上下相依從用舍由人
不由己乃是伏轅駒犢耳

還雙井次韻郭明叔長歌

君不見懸車劉屯田騎牛澗壑弄潺湲八十唇紅眼點漆金
鐘舉酒不留殘君不見征西徐尚書為國捐軀矢石間龍章
鳳姿委秋草天馬長辭十二閑何如高陽酈生醉落魄長揖
輟洗驚龍顏丈夫當年傾意氣安用蚓食而蝸蝓古人已作

泉下土風義可想猶班班郭侯忠信如古人薦書飛名上九
關詩書自可老斲輪智畧足以解連環銅章屈宰山水縣友
聲相求不我頑鵬翼垂天公直起燕巢見社身思還文思舜
禹開言路即看承詔著豸冠尚趨手板事直指少忍吏道之
多艱黃花零落一樽酒別有天地非人寰

題章和甫釣亭

放言

斬木開亭却倚石壁寒灘百雷古木千尺觀魚樂而相忘聽
鳥啼而自得去而之京洛之間數年猶常夢蘄巖之石

和曹子方雜言二首

正月尾垂雲如覆孟雁作斜行書三十六陂浸烟水想對西
江彭蠡湖人言春色濃如酒不見插秧吳女手冷卿小塢頗
藏春張侯官居柳對門當風橫笛留三弄燒燭圍棋覆九軍

義寧州志

卷三十上

藝文詩

十一 五百三十

盡是向來行樂事每見琵琶憶朝雲只今不舉蛾眉酒紅牙
捍撥網蛛塵曹侯束書丞太僕試說相馬猶可人照夜白真
乘黃萬馬同秣隨低昂一矢射落皂鷗雙張侯猶思在戎行
橫山虎北開漢疆冷卿智多髮蒼浪牛刀發硎司史注一邦作思
政成十綴舞紅粧兩侯不如曹子方朶頤論詩蝟毛張龜藏
六用中有光何時端能俱過我掃除北寺讀書堂菊苗煮餅
深注湯更碾盤龍不入香

酺池寺湯餅一齋孟曲肱懶著書騎馬天津看逝水滿船風
月憶江湖往時盡醉冷卿酒侍兒琵琶春風手竹間一夜鳥
聲春明朝醉起雪塞門當年聞說冷卿客黃須鄴下曹將軍
挽弓石八不好武讀書卧看三峯雲誰憐相逢十載後釜裏
生魚甌生塵冷卿白首太官寺樽前不復如花人曹將軍江

湖之上可相忘春鉏對立鴛鴦雙無機與游不亂行何時解
纓濯滄浪喚取張侯來平章烹茶煮餅坐僧房

按曹子方名輔太僕寺丞為冷庭叟門下客故詩數及冷
卿時庭叟為光祿寺卿張仲謀為閩漕山谷入館後寓居
於脯池寺故有俱過我來平章之句

送人赴舉

八歲作

送君歸去明主前若問舊時黃庭堅謫在人間今八年

次韻十九叔父臺源

諱襄字聖謨

聞道臺源境鋤荒三徑通人曾夢蟻穴鶴亦怕雞籠萬壑秋
聲別千江月體同須知有一路不在白雲中

答余洪範

道在東西祖詩如大小山一家同雪月萬事廢機關天上麒

義寧州志

卷三十上

藝文詩

十三

四百十

麟閣山中虎豹閑何時得邱壑明鏡失朱顏

伯父祖善耆老好學於所居紫陽溪後小馬鞍山為放
隱齋遠寄詩句意欲庭堅和之幸師友同賦率爾上

呈

樵入千巖靜松含萬籟寒兒童給行李藜藜對衣冠小檻聊
防虎時來即解鞍阿翁吹笛罷懷昔淚相看

嘲小德

中年舉兒子漫種老生涯學語轉春鳥塗窓行暮鴉欲嗔王
母惜稍慧女兄誇解著潛夫論不妨無外家

次韻和臺源諸篇九首

南屏山

巖積嵐光刻削成主人題作正南屏身更萬事已頭白相對

百年終眼青烟雨數峯當隱几林塘一帶是中庭紅塵車馬
無因到石壁松門本不扃

七臺峯

欲雕佳句累層巒深愧揮斤斲鼻端作者七人俱老大昂藏
却立古衣冠千年避世市朝改萬籟入松溪澗寒我有號鐘
鎖蛛網何時對汝發清彈

七臺溪

先生行樂在清溪滿世功名對畫脂一道寒波隨眼淨百年
高柳到天垂昔人無處問誰氏遺礎有情猶舊基猿鶴至今
烟慘淡賢愚俱盡水漣漪四時相及漏催滴萬事不疑冰泮
澌聊欲烹茶羹杞菊身如桑宁與天隨

陸張二
人號

疊屏巖

義寧州志

卷三十上

藝文詩

十四

三百九十

篁竹參天無人行來遊者多蹊自成石屏重疊翡翠玉蓮蕩
宛轉芙蓉城世緣遮盡不到眼幽事相引頗關情一爐沉水
坐終日喚夢鶉鴝相應鳴

靈壽臺

藤樹誰知先後生萬年相倚共枯榮層臺定自有天地鼻祖
已來傳父兄虎豹文章藏霧雨龍蛇頭角聽雷聲何時暫取
蒼烟策獻與本朝優老成

仙橋洞

橫閣晴虹渡石溪幾年鎖鑰鎮瑤扉洞中日月真長久世上
功名果是非叱石元知牧羊在爛柯應有看棋歸若逢白鶴
來華表識取當年丁令威

靈椿臺

固蒂深根且一邱少時常恐斧斤求何人比擬明堂柱幾歲
經營江漢洲終以不才名四海果然無禍閱千秋空山萬籟
月明底安得閒眠石枕頭

雲濤石

造物成形妙畫工地形咫尺遠連空蛟鼉出沒三萬頃雲雨
縱橫十二峯靜坐使人無俗氣閒來當暑起清風諸山落木
蕭蕭夜醉夢江湖一葉中

羣玉峯

洞天名籍知第幾洞口諸峯蒼翠堆雕虎嘯風斤斧去飛廉
吹雨曉烟回日晴圭角升雲氣月冷明珠割蚌胎種玉田中
飽春筍仙人憶得早歸來

次韻寅菴四首

義寧州志

卷三十上

藝文詩

十五

四百二十五

四詩說盡菴前事寄遠如開水墨圖畧有生涯如谷口泝無
卜肆在成都傍籬榛栗供賓客滿眼雲山奉燕居閒與老農
歌帝力年豐村落罷追胥

兄作新菴接舊居一原風物萃庭隅陸機招隱方傳洛張翰
思歸正在吳五斗折腰慙僕妾幾年合眼夢鄉閭白雲行處
應垂淚黃犬歸時早寄書

大若塘邊獨網魚小桃源口帶經鋤詩催孺子成雞枊茶約
鄰翁掘芋區苦棟狂風寒徹骨黃梅細雨潤如酥此時睡到
日三丈自起開門招酒徒

未怪窮山寂寞居此中常與世情疎誰家生計無閒地大半
歸來已白鬚不用看雲眠永日會思臨水寄雙魚公私逋負
田園薄未至妨人作樂無

楸宗奉議有佳句詠冷庭叟野居庭堅於庭叟有十八年之舊故次韻贈之

庭叟有佳侍兒因早朝而逸去其後乃揮椒藩甚嚴密

城西冷叟半忙閒人道王陽得早還四望樓臺皆我有一原花竹往中間初無狗盜窺籬落底事蛾眉失鎖闌每為朝天三十里時時驚枕夢催班

夷仲叔父幼子晬日

骨秀已知騏驥子性仁端是鳳凰雛不騰渥水稱神俊應出岐山作瑞符漸指家人知姓字試看屏上識之無乃翁斷獄多陰德逕作高門待汝車

元明後跋此詩云嗣深修撰弟初生骨清神秀可卜萬里故山谷有此佳句九方臯之風鑒何其神邪借令見今日

義寧州志

卷三十上

藝文詩

十六 四百字

忠憤義勇憂國愛君辟立千仞當有蟠空竒劇之句形容大節建炎二年十月望日鳳山下森爽臺大臨書

自巴陵畧平江臨湘入通城無日不雨至黃龍謁清禪

師繼而晚晴邂逅禪客戴道純款語作長句呈道純

山行十日雨露衣幕阜峰前對落暉野水自添田水滿晴鳩却喚兩鳩歸靈源大士人天眼雙塔老師諸佛機白髮蒼顏重到此問君還是昔人非

次韻郭明叔登縣樓見思長句

令尹登臨多暇日杖生芝菌筆生埃溪橫鳳尾寒光去山擁旌陽翠氣來晚市張燈明遠近清樽留客舞徘徊紅裳珠履知多在點檢惟無措秀才

叔父釣亭

檻外溪風拂面涼四圍春草自鉏荒陸沉霜髮為鈎直柳貫
錦鱗緣餌香影落華亭千尺月夢通岐下六州王麒麟卧笑
功名骨不道山林日月長

同韻和元明兄知命弟九日相憶

革囊南渡傳詩句摹寫相思意象真九日黃花傾壽酒幾回
青眼望歸塵蚤為學問文章誤晚作東西南北人安得田園
可溫飽長拋簪紱裹頭巾

萬水千山厭問津芭蕉林裏自觀身鄰田雞黍留熊也風雨
關河走阿秦鴻鴈池邊照雙影脊令原上憶三人年年獻壽
須歡喜白髮黃花映角巾

紫陽溪

不到紫陽溪上青楓忽爾驚秋苦嘆世間花發水聲依舊東
義寧州志

卷三十

藝文詩

十七

三百七十

流

公擇用前韻朝戲雙井

萬仞峯前雙井塢婆娑曾占早春來如今摸索蒼龍壁沉井
銅瓶漫學雷

又戲為雙井解朝

山芽落磴風回雪曾為尚書破睡來勿以姬姜棄顛頓逢時
瓦釜亦鳴雷

夜發分寧寄杜澗叟

陽關三疊水東流燈火旌陽一釣舟我自只如常日醉滿川
風月替人愁

叔父給事挽詞六首

名廉字夷仲

元祐宗臣考十科公居八九未為多功名身後無瑕點孝友

生知不琢磨

平生治獄有陰功忠孝臨民父母同顛上樵夫談卓令宣城
老吏識于公

三晉山河數十州頻年水旱不能秋我公出把司農節粟麥
還於地上流

晉地無戎卧賊曹民兵賜笏解弓刀六年講武儒冠在不踏
金門着戰袍

軍容百萬轉風雷獨料王師不戰摧三篋封書公對獄元豐
天子照奸回

榮祿常思澤九宗山摧梁壞併成空百年遺恨誰昭洗他日
諸郎有父風

題徐氏書院

即徐禧羨魚亭故基

義寧州志

卷三十

藝文詩

八

三百五十

學書但學溪老鶩讀書可觀樵父歌紫髯將軍不復見空餘
巖桂綠婆娑

洪範以不合俗人題廳壁二絕句次韻和之

寂寥吾道付萬世忍向時人覓賞音搔首金城西萬里樽前
從此嘆人琴

埋沒高才築釣間風雲未會要鯢桓南康郡下參軍耳付與
紅塵白眼看

答余洪範

懸罄齋厨數米炊貧中氣味更可思可無昨日黃花酒又是
春風柳絮時

寄黃龍清老三首

萬山不隔中秋月一雁能傳寄遠書深密伽陀枯戰筆真成

相見問何如

風前橄欖星宿落日下枕柳羽扇開照默堂中有相憶清秋
忽遣化人來

騎驢覓驢但可笑非馬喻馬亦成癡一天月色為誰好二老
風流只自知

梁口吟

張商英 天覺

迢迢一水遠千山桑柘陰陰聚落寬好事莫傳江北信漁樵
自不識衣冠

書黃魯直詩

太常少卿張耒 文潛淮陰

江南宿草一荒邱試讀遺編涕不收不踐前人舊行迹獨驚

斯世檀風流一尊華髮江邊客萬里黃茅嶺外州虎豹磨牙

九關邃重華可訖且南遊 辛巳歲魯直見余黃州江中

義寧州志

卷三十一

藝文詩 十九 四百二十

訪雲巖道中作

一灘清淺一潭深疑是仙源可訪尋行到水窮溪杪處誰知
摩詰此時心

送郭明叔知分寧

金部郎中孔平仲 毅父清江

西安瀟灑我常遊多自修川泛小舟民本豐饒矜氣節士皆
儒雅出公侯梅山晚翠屏當戶茶井芽香雪滿甌預想絃歌

富閒暇白雲深倚鳳凰棲

贈黃魯直

秘書正字陳師道 后山彭城

相逢不用早論交宜晚歲平生易諸公斯人真可畏見之三
伏中凜凜有寒意名下今人有胸中本無事神物護詩書星

斗見光氣惜無千人力負此萬乘器生前一樽酒撥棄獨何
易我亦奉齋戒妻子以為累君如雙井茶眾口願共嘗顧我

如麥飯猶足填飢腸陳詩得筆意願立弟子行何以報嘉惠
江湖永相忘

墨梅

邑人王 鈇 承可

前身姑射冰相似今代潘妃玉不如坐對真成在江國淡烟
微雨暗扶疎聲華集

絕句

津頭短短長長柳陌上朱朱白白花一段風烟三百里杜鵑
愁絕客思家錦繡萬花谷

戊午山間對雪

邑人 徐 俯 師川

雪中出去雪邊行屋下吹來屋上平積得重重那許重飛來
片片又何輕簷間日暖還為雨林下風吹再落晴表裏江山
應更好溪山已復不勝情瀛奎律髓

義寧州志

卷三十上

藝文詩

二百八十

同曾戶部諸公尋梅對奕

處處已收南畝稻閒閒還看北山梅累觴聊爾酡顏在對局
怡然笑口開掃徑似知佳客至杖藜唯可數君來移松種樹
鄱陽老章甫風帆歲一迴

跋分寧令韓子蒼代葛亞卿作詩後

夏木陰陰欲放船黃鸝啼了落花天十詩說盡人間事付與
風流葛稚川

春日遊修溪上

雙飛燕子幾時回夾岸桃花蘸水開春雨斷橋人不渡小舟
撐出柳陰來後村千家詩

見黃太史

蘭州高 荷 子勉 荆南

萬里南溪郡黃香得賜環盛名喧海內推翮返雲間太史資

誠峻郎官選亦慳朝廷才特起堂奧援誰扳一夢追前事羣
公兀後艱中傷皆死禍放逐罕生還別駕之戎棘僑居傍葺
管相知諸鳥道聞說異人寰揚子家元窘王維室久鰥鵬來
心破碎猿叫淚潺湲達觀終難得羈愁必易刪衆情相憫惻
靈物自恬憫迴閣澄秋晚幽窓聳夜跼蜀天何處盡巴月幾
回彎陸履魂空斷遺弓涕忽潛石門淒殿楯銅雀慘宮髮帝
統聯仁聖皇恩感豔頑網羅疎黨禁株蔓掃朋姦點檢金閨
彥凋零玉筍班尚令宗廟器遙隔鬼門關拊髀咨詢及含香
誥命頒笑談趨赤縣吟咏落烏蠻奏記懷東觀移文領北山
應將九遷待未補七年閑士媿千鈞弩身謀五兩綸退藏欣
望氣延佇竊窺斑昌谷詞源窄浯溪筆力孱斲輪深類扁投
斧欲隨般鵠卵真能伏龍鱗敢冀攀不嗔無紹介試遣畧承

義寧州志

卷三十上

藝文詩

二

五百三十

顏宋文鑑

寄題雙井黃稚川雲巢

諫議大夫洪芻駒父南昌

雲巢一上十五里中有今世巢居子雞鳴犬吠百里餘不知
天際去此幾平生深契鳥巢禪剪茅蓋頭萬事已宴坐經行
飛鳥上人間榮辱不到耳蝸牛兩角竟何為鷦鷯一枝端自
喜我有一塵落城市章服褻狙聊復爾武陵未訪桃花源修
江儻問桃花水會取櫻桃洞前路杖藜扶衰自此始

黃龍山

分寧令韓駒子蒼成都

未雨萬木翳既雨羣山開山神若眷予一掃風中埃穿雲夾
路松禪伯手自我我來植拄杖聽度松風哀幽賞未云足暮
色蒼然來何當白玉輪碾上西南垓

鳴水洞

崇山蓄靈泉萬古去不息瀦為百斛深散入千渠溢其東
民田又北尋山腋斷崖如破瓜飛瀑中蕩激大聲或雷霆細
者亦等瑟末流乘半山十里見沸白得非拖天紳常恐浮地
脉呂梁丈人老尚與泪偕出我欲蹋驚湍下窮齷齪石惜哉
意徒然屬此歲凜慄安得汝南周斷取白蛟脊歸之龍泉峯
山門夜喧席

分寧署中和李上舍冬日

北風吹日晝多陰日暮擁階黃葉深倦鵲遶枝翻凍影飛鴻
摩月墮孤音推愁不去如相覓與老無期稍見侵顧藉微官
少年事病來那復一分心

復齋漫錄子蒼和李上舍冬日詩日暮擁階黃葉深之句
最為世所推賞故李彭商老有建除體贈子蒼云滿朝以
詩名何獨遺大雅平生黃葉句模索便知
價蓋是時子蒼自館職斥宰分寧時也

義寧州志

卷三十上

藝文詩

廿二 五百二十

吳彩鸞寫真圖

謝 邁 如縹 臨川

天上鳳凰難獨宿人間翡翠本雙棲丹青不與文簫共誰遣
雉東迷雀西

田家春日

吏部 郎中 黃次山 季岑

緯竹梁溪面誅茅舍道傍臘收冰下紙春課社前薑露草牛
羊長風花杖屨香人生但如此官獨為誰忙 宋詩 拾遺

李伯時畫黃知命騎驢圖為賦長歌

邢居實 數夫 原武

長安城頭烏欲棲長安道上行人稀浮雲卷盡暮天碧但有
明月流清輝君獨騎驢向何處頭上倒著白接離長吟搔首
望明月不學山翁醉似泥到得城中燈火闌小兒拍手攔街
笑道傍觀者那得知相逢疑是商山皓龍眠居士畫無比搖
毫弄筆長風起酒酣閉目望窮途紙上軒昂無乃似君不學

長安游俠誇年少臂鷹挾彈章臺道君不能提攜長劍取靈
武指揮猛士驅貔虎胡為脚踏梁宋塵終日飄飄無定所武
陵桃源春欲暮白水青山起烟霧竹杖芒屨歸去來頭巾好
掛三花樹

王直方詩話雙井黃知命初自江南來與彭城陳履常俱
謁法雲禪師于城南夜歸過龍眠李伯時知命衣白衫騎
驢緣道搖頭而歌履常負杖挾囊於後一市大驚以為異
人伯時因畫為圖數夫作長歌云云數夫時年未二十也

贈黃魯直

節孝徐積仲車處士陽

不見故人彌有情一見故人心眼明忘却問君船住處夜來
清夢繞西城

宿上方院

翰林汪藻彦章學士興

問津漁子浦休駕法王城一雨夜來過數峯烟際明藤蘿月
不到鐘磬寒逾清信美欲歸去杜鵑如許聲

義寧州志

卷三十上

藝文詩

廿三

四百六十

浮橋

邑人陳興浪顛

千尋鐵綰蒼龍骨七十舟橫赤鴈行來往渾如履平地渡頭
無復立斜陽

贈別黃超然

政和王庭珪民瞻進士安福

我生不見黃太史猶及諸公談遺事藍田生王海生珠謂君
眉目無乃似誰作江西宗派圖如今傳法不傳衣句中有眼
出月脇密付嫡孫人未知宗風後必喧人口雲夢更須吞八
九他年拈此一瓣香獅子窟中獅子吼

永思堂

淳熙進士徐得之思叔

鳳凰山畔永思堂山谷先生有舊鄉修水年年流不盡斯文
長與日爭光

試雙井茶

先生老作宜州鬼誰與一甌同注湯至今捧着雙井碗猶帶
是翁書傳香方輿勝覽

燈下讀山谷詩

寶謨閣學士 楊萬里 廷秀吉水

天下無雙雙井黃遺編猶作舊時香百年人物今安在千載
功名紙半張使我詩篇如許好關人身事亦何嘗地爐火暖
燈花喜且只移家住醉鄉

黃嗣深尚書自臨川省其兄嗣文戶部於宜春用元明

魯直倡和韻題李生墨竹梅

秘書少監 曾 幾 茶山贛縣

紛紛畫手調紅綠好似桃花配叢竹豈無短紙作江梅雪裏
溪邊太幽獨李侯胸中有佳處研滴松煤聊寓目與梅擇對
無可人分咐此君真不俗淡烟小雨空濛地何得月明疎影
足始知璀璨出斜枝詩畫古來真一族

義寧州志

卷三十上

藝文詩

二四 四百五十五

黃嗣深尚書自仰山來惠茶及竹熏爐

茗椀中超舌界熏爐上悟香塵坐我集雲峯頂對公小釋迦
身

黃嗣深尚書見訪

騎氣初占客至履聲忽報公來不亂空庭鳥雀何妨滿席塵
埃

跋山谷書范滂傳帖

少師樓 鑰 大防鄞人

宜人初謂宜於人菜肚老人竟不振承天院記顧何罪一斥
致死南海濱賢哉別駕眷遷客不恤罪罟深相親哀哀不容
處城闈夜遣二子從夫君一日攜紙句奇畫引筆行墨生烟
雲南方無書可尋問默寫此傳終全文補亡三篋比安世偶
熟此卷非張巡巖巖汝南范孟博清裁千載無比倫坡翁侍

毋曾啟問百謫九死氣自伸別駕去官公亦已身雖既衰筆
有神我聞此書久欲見摹本尚爾况其真輟君清俸登堅珉
可立懦夫羞佞臣

岳阿
程史

送分寧主簿趙振文

去去江西不作難片帆雙槳蕩秋蘭已知官業非時樣猶喜
情親耐歲寒志大自然羞附驥官卑何用嘆棲鸞少卿膝上
加文度更比年時刮目看

和何應辰過山谷墓

著作
佐郎王炎

海叔
婺源

何年馬鬣埋玉樹上有喬木清風寒琳瑯金薤落四海萬家
頓挫隨毫端追攀前輩豈無意偶來弛擔鳴珂里生恨與公
相後先臨風三嘆不能已論詩誰解鍼膏肓人間今日無黃
香經過一酬樽中碧明月灣頭山間寂

義寧州志

卷三十上

藝文詩

二五
四百三十

修水晚步

山靜天同碧溪流月影遲緩行聊問俗小立却支頤樵斧寒
尤響漁舟晚更移老夫無伴侶稚子獨追隨
風定留黃葉波深湧白沙前山惟道院斷岸半漁家老去忘
時事閒中度歲華經旬如再出便可探梅花

述懷

邑人
冷應激

覺齋

位列三台貴旌旄障雨深仁廉兩個字忠孝一生心出省輕
侯印歸寧問俸金携家半窻月撐轉古榕陰

謝御賜紫金魚袋烏紗象簡

日映翠窻曉殿深君恩稠疊駕親臨褒衣紅濯天機錦束帶
黃分內帑金何幸清班容宦轍自慚白髮點朝簪撥亂致治
平生學消得君王念苦辛

聽月樓

聽月樓高接泰清樓高聽月最分明轉空軌軌冰輪響擣藥
叮嚙玉杵鳴樂奏廣寒音細細斧侵丹桂韻丁丁更須一派
天風起吹下嫦娥笑語聲

黃宰致江西詩雙井茶

方岳 元善寧海

黃宰示我以江西詩禪之宗派淪我以雙井老仙之雪香磚
爐春着兔毫玉石鼎月翻魚眼湯夜牕搜攬十年讀候蟲鳴
秋聲殷牆廼翁詩家第一祖不用棒喝行諸方掀翻杜陵自
作古夜半衣鉢誰升堂單傳橫出二十六許歛聞鴻雁行
雅聞滕閣藏墨本欲往從之山阻長牙箋太冊忽在眼荒苔
茅屋森珩璜東湖柳色入眉宇君其幾代之諸郎不離文字
話祖意傳燈肯與留山房寧知三生受昏闇縱有此燈無此
義寧州志 卷三十上 藝文詩 二六 四百五十

光宜州戍樓山月苦茫茫叅到無何鄉

送道士歸得日觀 用唐襄陽李質韻

邑人章鑑 杭山

風月詩幾卷江湖屐一雙斷蛟懷劍石跨鶴叩禪窓土潤巖
生雨林幽寺隔江歸當訪仙隱相對酒盈缸

杭山

買得漁磯繫釣船魚龍吹浪駭鷗眠從來白石清泉地勝似
青山小洞天浪對客吟思却虜徇觀人弈悟籌邊夜來風雨
秋聲早一段新愁雪滿顛

過毛竹山

一重關復一重關一步難於一步難地僻林深晴亦溼山高
風猛夏猶寒斷崖雲影掛枯樹劈澗雷聲走怒湍不信世間
陵谷變野樵偏識舊衣冠

杭山八景

萬箇長松覆短牆碧流深處讀書房香生石觀春雲溼影落
篝燈夜雨涼巨代陶鎔周禮樂百年嘉會宋文章天機悟到
忘言表又喜濤聲送夕陽

萬松書舍

古洞春泉一脈遙驟施雷雨過青宵飛湍直下三千丈急溜
橫穿十二橋雪灑石砭瓊練碎翠分柳樹玉花飄曉來醉倚
高樓望疑是銀河墮碧霄

章洞春瀑

泠泠雙澗瀉秋音萬齒溪頭奏一琴雨後更添猿鶴操夜寒
真是水龍吟年光送盡從朝暮律調含來自古今借得許由
當日耳聽頻誰不為清心

兩澗鳴琴

達邦大道兩迢迢金轡玲瓏匹馬驕腰裏嘶風蹄蹀躞驤騰
掣雷尾蕭騷雄聲已騁才人德猛氣尤思大將驍鳳臆龍鬣

義寧州志

卷三十一

藝文詩

二十七

五

誰可並郭家獅子著先朝

雙衢嘶馬

內史名題古釣臺高風凜凜勢崔嵬晚烟楊柳垂青縷春雨
桃花點綠苔百尺絲綸波蕩漾一宗詩派水滌迴何時來借

閒燈覽滌盡塵襟萬斛埃

石觀釣臺

一邦佳景萃峰頭宇宙鍾靈自有由銀竹霏霏山氣盛火輪
顛顛水光浮年逢旱澇他方苦世際豐穰此處優瞻望巍峩

殊不遠登臨彷彿帝王州

板嶺雲霞

昔賢曾此著名香地位雙清四座涼吹送幾多攀桂客照來
無數探花郎光浮盞面龍鱗動聲透琴心兔魄揚爽我襟懷

明我德步蟾擬駕大鵬翔

涼亭風月

同雲收盡日曛曛曉霽分明見九宮百里遠排銀筆架半峯
高疊玉屏風螺鬟鬢鬢深藏翠石劍稜稜欲露鋒縱使丹青

施妙手難將寫入畫圖中

九宮齋雪

魯直弟稚川作屋峯頂名雲巢

僧惠洪 覺範

只今海上青石牛曾卧天子黃金屋下看朱紫如堵牆上前
諸公遭牴觸眼高四海鏡面空潛山歸來巾一幅慙愧君家
小馮君自是河東真鸞鷲文章五色體自然秋水精神出眉
目人間不識但聞名水非醴泉石非玉江南一峯獨高寒時
時笑語雲間宿弟兄出處兩相高故作雲巢對山谷

雪夜讀涪翁作愛之因懷其人奉寄超然

溪雨初收岸草微柳絲堪入綠羅機望中情遠恨烟樹何處
暖多嫌衲衣却信真人還有夢豈關禪子未忘機春風痛與
傳消息教憶舊山新翠微

酬余荀龍

詩話拾遺荀龍豫章人家藏書甚富好談易作詩與潘邠老洪駒父諸公相善善權贈詩

義寧州志

卷三十一上

藝文詩

天 四百八十五

蓋紀其實也

僧善權 吳中

長歌濯足對東湖萬卷胸蟠有壯圖交戰似聞夫子勝憑虛
應笑列仙矐草中射虎疑山石江上封君記木奴寂寞生涯
端自守晴窓紀筆太元無

按天台山志有余荀龍玉京洞詩三首其一云羽駕歸來
洞已扃洞門深鎖讀殘經瓊臺一覺仙都夢不見松根長
茯苓次云東臨滄海宴羣仙誤入桃源小洞天一局殘棋
消幾刻老龍鬚甲已蒼然三云半山松柏散天聲芝蓋當
年憇赤城我是上皇芸閣吏玉京應有舊題名荀龍詩集
今不傳三詩妙有仙趣亟錄之

退黃龍院作

僧祖心 晦堂

不住唐朝寺閒為宋地僧生涯三事衲故舊一枝藤乞食隨

緣過逢山任意登相逢莫相笑不是嶺南能

辭張無盡請住豫章觀音寺

僧惟清 靈源

無地無錐徹骨貧利生深媿乏餘珍鄺中大施門難啟乞與

青山養病身

羅湖野錄黃魯直與興化海老手帖云承觀音虛席上司有意于清兄清兄確欲不行亦甚好蟠桃三千年一熟莫作退花杏子摘却此事黃龍興化亦當作助道之緣共出一臂莫送人上樹拔却梯也

弔黃龍和尚塔

僧克文 雲菴

示滅師何遠空遺塔此中僧閒四海錫誰復九年風鳥外干

峯遠人間一徑通寥寥朝與暮唯有白雲同 禪藻集

詩餘 附

次韻賀方回青玉案詞送山谷弟貶宜州

黃大臨

義寧州志

卷三十上

藝文詩

二十九 四百四十五

千峯百嶂宜州路天黯淡知人去曉別吾家黃叔度弟兄華

髮舊山修水異日同歸處樽壘飲散長亭暮別語丁寧不

成句已斷離腸知幾許水村山館酒醒無寐滴盡空階雨 花菴

絕妙詞選

青玉案

寅菴解為萍鄉宰伯兄元明作

黃庭堅

行人欲上來時路破曉霧輕寒去隔葉子規聲暗度十分酒

滿舞裊歌袖沾夜無尋處故人近送旌旗暮但聽陽關第

三句欲斷離腸餘幾許滿天星月看人憔悴燭淚垂如雨

謁金門

示知命弟

山又水行盡吳頭楚尾兄弟燈前家萬里相看如夢寐君

似成蹊桃李入我草堂松桂莫厭歲寒無氣味餘生吾已矣

清平樂

示知命

乍晴秋好黃菊歌烏帽不見清淡人絕倒更憶添丁小小
蜀娘謾點花酥酒槽空滴真珠兄弟四人別住它年同插茱
萸

點絳脣

重九日寄懷嗣直弟次東坡韻二首

濁酒黃花畫簾十日無秋燕夢中相見似作枯禪觀 鏡裏
朱顏又減心情半江山遠登高人健寄語東飛鴈
幾日無書舉頭欲問西來燕世情夢幻復作如斯觀 自歎
人生分合常相半戎雖遠念中相見不托魚和鴈

西江月

崇寧甲申遇惠洪上人於湘中洪作長短句見贈云大厦
吞風吹月小舟坐水眠空霧窓春色翠如葱睡起雲濤正
擁往事回頭笑處此生彈指聲中玉牋佳句敏驚鴻聞道

義寧州志

卷三十

藝文詩

三十

四百三十

衡陽價重次韻酬之時余方謫宜陽而洪歸分寧龍安
月側金盆墮水鴈回醉墨書空君詩秀色兩園葱想見衲衣
寒擁 蟻穴夢魂人世楊花踪跡風中莫將社燕等秋鴻處
處春山翠重

畫堂春

春怨

徐俯

落紅鋪徑水平池弄晴小雨霏霏杏花憔悴杜鵑啼無奈春
歸 柳外畫樓獨上凭欄手撚花枝放花無語對斜暉此恨

誰知

草堂詩餘

卜算子

春愁

天生百種愁掛在斜陽樹綠葉陰陰自得春草滿鶯啼處
不見凌波步空憶如簧語柳外重重疊疊山遮不斷愁來路

花菴
詞選

鷓鴣天 漁父

七澤三湘碧草連
洞庭秋到水如天
朝廷若覓元真子
不在雲邊即酒邊
明月棹夕陽船
鱸魚恰似鏡中懸
絲綸釣餌都收盡
八字山前聽雨眠

詩

元

幕阜山

許元信

山高一千八百丈太元二十五洞天雪花飛下水衝石翠嶂
撥開風捲烟金鯉一雙遊碧沼石田數畝產紅蓮我來絕頂
無他事為訪仙人葛稚川

前題

胡天游

幕阜山聳千餘丈我疑山頭即天上捫蘿躡蹻蹬到山巔又如
平地望青天始知天高百萬應無極幕阜蒼蒼一卷石洞庭
八自古所傳對此遙看如鏡圓若令更上三萬丈那知天下
有山川

毛竹山

雷仲益

義寧州志

卷三十上

藝文詩

三
四百

一望西南紫翠堆勝遊何憚陟崔嵬連峯秀出天邊畫急澗
聲鳴地底雷官舍連雲栖古驛人家燒竹煮新醅靈蹤覓得
陰崖石曾是旌陽試劍來

試劍石

邑人
余存耕

旌陽古劍寒如水化成煉就陰陽精鐵花亂雪星斗明白帝
夜哭蛟龍驚一朝提攜試蒼石海風吹斷寒雲色天地高低
兩磨輪日月東西雙合璧劍光如風石如泥劍風飛過石不
知蒼松怒號起雷雨翠峽劈破青琉璃當年一斷成千古融
液至今難綴補拂開蒼蘚勒奇勳好向岐陽作周鼓

秋崖歌

崖翁汝今行年五十有八未知非七尺之軀將焉為少日不
待兮老日催胡為一燈風雨兀兀窮年幾既不能提携長劍

安邊陲揚眉吐氣干虹蜺又不能狸膏金距學鬪雞辟鷹走
馬章臺西徒事乎章甫之冠縫掖之衣規行矩步不暫違後
汝而生者既已班聯玉筍腰金魚先汝而生者亦已告老平
園歸春花秋月雖有待奈何江流白日晝夜東西馳只須床
頭易尚守濟叔癡崖翁笑撫掌此意真堪喜憶昔扣角人致
之牛口君莫疑亦有種瓜人金章解去長鏡隨運乖則賢豪
遠引山林棲時至則釣屠崛起風雲依斯人賢愚本無異時
耶命耶造物顛倒同兒戲溪邊五畝田春深雨一犁巖邊五
畝園秋深烟滿畦或飲無事酒或唸自在詩稱身不必服紈
綺適口不必求甘肥人生羸餘分外事何必屢瞰殘月聽寒
雞

春日寓大都寄弟仁山

邑人祝彬文夫

義寧州志

卷三十上

藝文詩

三三 四百五十八

春日載陽笋蕨嫩桃花滾浪鰕鱖肥何須更待秋風起思憶
蓴蘆始欲歸

扁舟遠涉思悽悽旅食京華歲月稽閑動車聲驚午枕悠悠
殘夢大江西

南望松楸縹緲間棣華韡韡遠難攀七十榮親求未遂只緣
干祿客燕山

告老榮除擬賦歸綠衣聊爾換緋衣鶴鶴不作鵬程夢尋仗
蓬蒿自在飛

書悠然先生道院

祝文夫號悠然

學士揭傒斯曼碩

地僻疑無路天開忽見田溪山如有待草樹亦鮮妍和米芋
頭飯無鹽苦菜羹山中甘此味自足樂餘生

絕句

柳貫

舊聞雙井團茶美近愛麻姑乳酒香不到洪都領佳絕吟詩
真負九迴腸

送王起元之分寧教官任

學士危素太樸
金縷

大元設學校於以教萬民吁嗟去古遠世降何紛紜周孔不
可見世道日以湮儒官竊廩祿法度豈復遵教化何由宣禮
樂亦以淪在藪無鳳凰在郊無麒麟英宗皇帝時逆氣橫乾
坤賊子不知父亂臣已忘君臣素憤薄世胆氣長困輪念之
萬感集血淚射秋文思見豪傑士再見民風淳閭閻王教諭
我里君子人之官分寧縣挂席當仲春撞鐘集諸生講論明
彝倫况逢堯舜君德澤周八垠高歌猛虎行慷慨為子陳

雙井釣臺

無名氏

石磴潺潺遠碧流高人跂足且垂鈎一灣明月無今古兩岸
義寧州志

卷三十上

藝文詩

三四 四百四十五

清風渾夏秋何事渭濱求鯉王不須江畔探羊裘登崖掃石
窺黃字猶見當年鐵畫留

明

太祖皇帝哭陳龍詩

陳將軍威烈烈寶刀橫舞光照雪氣吼風雷陣雲裂奈何一
疾在膏肓英雄飛散沙場月陳將軍難再見料得英魂死猶
戰江空歲宴好還家汝家原在分寧縣

艾郡途中

提學宗壘
副使

一雨農郊足村村隔水蛙山腰墮燕壘溪面落桃花野色分
人影松濤漾葛紗牛羊催日沒燈火宿民家

毛竹山

提學夏寅
副使

連峯望且邇斗拔凌蒼冥鴻濛實誰宰陶范得此形得非棲

仙境外列障風屏日晏不可上止息郵夫亭晨興具食已結
束駕輕輶健兒畢嚴辦前隊揚旗於徑勢走長蛇宛宛穿林
坳綠苔墜梯磴險阨過井陘下觀狼牙壑魄礪發劍矸急泉
瀉其間高屋下建瓴迎鬪結不解怒呼無時停豈有不平事
必爭無汝聽菖陽茁虎鬚九節惟寸蓬采弄香滿手思將制
衰齡効多豨苓輩吾見本草經老樹卧欹側露根抵巖扃初
疑厚雪壓久蠹由饒蛉又疑雷斧除闢路勞神丁迂行未知
休漸出天中庭嵐霏拂面冷小雨秋溟溟平生食粟軀豈復
生兩翎既窮萃律頂恍然遇山靈老眼眩日花粲粲如有星
衆騶悉一覽以供吾使令安得李杜才豪發仍半醒繡心吐
奇章著狀如丹青

謁濂溪先生祠

提學副使邵寶二泉

義寧州志

卷三十上

藝文詩

三五

四百八十

數椽幽倚此溪東曾坐當年太極翁風月未分光霽外水雲
長在靜虛中情留棠樹連郊綠興寄蓮花別渚紅盥罷滄浪
成薄薦廣庭春草雨濛濛

謁山谷先生祠

修墓立祠置祭田同守巡行

都御史林俊

大蘇竝峙筆如杠道眼臨川亦慣降雙井書香懸正脉一元
詩派重西江墓田我共謀裡薦佛果誰專折幔幢斷礎荒硤
舊祠下後先激義走州邦

清水巖

禮部尚書胡濙

開闢龍門一洞天玲瓏紫翠結雲烟羣仙拱伏環千里元氣
流通湧一泉赤脚禪僧騎虎入黃冠仙子伴龍眠我來掃石
焚香罷一笑心同太極先

九日遊南山

參政王綸

遠尋詩派到南山拂石牽蘿逐磴攀笑倚欄干窺斗柄驚疑
烏帽落塵寰水流橋小人爭渡雨細燈昏僧閉闕回首蒼生
懸望切來遊只許暫偷閒

前題

僉事王純

曉仗金風萬斛涼客中樽酒對重陽望迷紅樹心先醉吟入
黃花詩亦香半夜秋聲鯨吼雨一天寒氣鴈呼霜凭闌一笑
乾坤窄自覺腰間劍有芒

修江八景

邑人陳玦

山勢廻翔類火精晨曦到處倍增榮六街蘭麝花香醒滿地
龍蛇樹影橫瑞表四靈符世治光全五彩應文明野人仰戴
慙無補葵藿衷誠盡日傾鳳巒朝陽
皎皎金波海上升寒光水色互相凌鮫宮瓦露金鱗細桂殿

義寧州志

卷三十一

藝文詩

三十六
四百七十

奩開寶鏡澄萬里無涯千頃玉兩閒合璧一壺冰乘槎來往
人多少屈指伊誰契濯纓犀津夜月

堂堂危構大江東世遠人亡道不窮赤子三朝歌善政斯文
千載仰宗工清霜久裛池荷綠烈日難消瓦礫紅運際太平
新棟宇英材依舊挹光風瀛溪書院

當年未遇果何求曾此憑高獨理鈎形跡一時沉草莽詩名
千載重山邱清風朗月尋常景紅蓼黃蘆幾度秋立斷夕陽
空仰止冷烟寂寂水悠悠山谷釣臺

一鑑清冷峻嶺巔飛仙曾此礪龍泉再無蜃跡過深洞尚有
虹光燭上天羽駕飄揚蓬島迥血星零落紫苔鮮汪汪不竭
長如此滄海桑田幾變遷旌陽劍池

青蛇重擲過禪關影落經臺只等閒鑿破坤輿通楚水展開

靈蹟壯吳山降龍老衲名空在跨鶴仙人駕未還愧矣此身
生太晚不同一笑翠微間黃龍法窟

萬壑清流冷切膚一泓百沸獨何殊傳薪不必勞虛力濯足
長堪去舊汚融液雪霜成白水薰蒸天地即紅爐山翁煖酒

能招客欲覓青帘試玉壺石壁溫泉

聞說雷霆叱六丁戴梁砥柱果天成儘教都騎如雲擁不問
孤舟盡日橫水面遙瞻蹲餓虎脚頭平步踏長鯨海東鞭石

同悠久萬古中流靜不驚棲霞柱石

前題

廣東參議龔暹南昌人

地偏吳楚雄天遠衡廬小文彩播簫韶扶桑日初曉鳳嶽朝陽

遠派來雙井澄潭玉一泓蟾光明徹底驚起老龍精犀津夜月

時雨窻前草微風水上蓮靜中觀太極天地共悠然瀟溪書院

義寧州志

卷三十一

藝文詩

三七 五百

渭水終元輔嚴灘老敝裘如何雙井骨猶自恨宜州山谷釣臺

清波浴星斗白石磨干將可惜汗妖血何由借尚方旌陽劍池

武昌黃龍隱天竺青蓮開為問談空叟何時得再來黃龍法窟

石竇開雙竅陽春自四時慙慙謝良牧時為洗瘡痍石壁溫泉

造化培根基乾坤正方面孤高百世名顧爾重留戀棲霞柱石

石嶺雲橫

邑人周銘可菴

磻磻幽岑幕幕雲垂陰布影弄氤氳若非洞口蒼龍蟄安得

山頭鐵騎屯夜嘯孤猿成獨占晝眠閑鹿謾平分也應變化

為霖雨潤及山靈功莫論

金雞獨石

不見黃金鑄羽儀空遺拳石已多時別從函谷關中去歸向

扶桑樹上啼道士叱來羊自起將軍射處虎何疑乾坤毓秀

真如此佳致還應入品題

挽劉隱君衡

知縣 蕭光甫 莆田人

塵滿空庭一榻虛南州高士夢蘧蘧烟霞已闕重泉玉門巷
猶來長者車薤露我應悲楚些若堂誰復致生芻貽謀為卜
三槐第賸有床頭萬卷書

犀津潭

訓導 李鰲 廣西人

月浸平津西角灣石崖玉色昔人剡至今一片涓涓影還逐
清流下碧湍

旌陽山

邑人 石彥誠 誠之

山色蒼蒼水色光百花開盡蕙蘭香旌陽屹立閑迎送看盡
行人歲月忙

海湖山

邑人 蔣俊

義寧州志

卷三十上

藝文詩

三 三百七十

解組歸來鬢已斑結廬初傍海湖山茅簷倚竹成三徑草榻
連雲只半間人到靜中方識險鳥飛倦處始知還如今已作
巖栖客惟有琴書伴我閒

征村偶興

邑人 查雋 歸樵

夜宿征村古渡邊水聲聒聒不成眠火光問是誰家屋櫓响
知他何處船龍石巖前風細細馬蹄潭裏月娟娟故廬不遠
明朝到脫却霜裘當酒錢

百花莊

南坑噪里築幽居聞說幽居事事殊一水去春雲外碓千山
環列畫間圖桃花迷渡春移棹藜杖分光夜讀書日日携琴
仍載酒百花莊上樂何如

南畝農歌

田夫隴上唱新腔擊壤聲中興味長共喜豐年禾黍熟相傳
社日酒杯香眼花自覺歌聲沸耳熱何妨笑語狂月浸花村
無犬吠家家五袴頌時康

東岡牧笛

牧童短笛弄無休牛飽高岡百不憂一曲翻成前日調數聲
吹破隔江秋腔諧律呂催詩興風遞宮商動客愁幾度月明
歸去晚倒騎牛背樂悠悠

兔穴清泉

白兔何年入此山斷崖鑿破水潺潺聲喧玉溜風生細色映
瑤空月浸寒有耳巢由雲外洗無弦莊子靜中觀枕流漱石
平生事何日相尋濯碧瀾

龍崖峭壁

義寧州志 卷三十一 藝文詩 三九 四百三十
逆湧懸崖勢最雄崢嶸頭角幾春風昂霄未展擎雲爪起蟄
常懷濟物功影落潭心驚躍鯉煙蒸絕頂斷飛鴻劍池隔岸
遙相對共有神光耿太空

題祝氏樵樂堂

邑人熊軫退菴

曾約仙人坐看棋山風吹老桂花枝買臣五十行當貴未許
林泉得自怡

祝大澂墨沼歌

毛良質 鈞菴 金川

祝公草聖真殊調楷書一法尤精妙大開墨沼在流芳彷彿
滄溟浸員嶠水光激灑生晴寒溶溶濛濛天地寬蛟龍躍出
染鱗甲鷗鷺飛來污羽翰有時掃罷銀箋紙一目仙橋起咫
尺神嶺陽暉照水紅書堂雲氣隨波起有時鋪展千百縑左
揮右灑霜毫尖連旬累月欲消涸乾溪流出湧泉添春風吹

花香入硯對景潛心不辭倦華藻平鋪點點星柳條斜蘸絲
絲線綠陰滿地炎埃清倚闌臨眺舒嗔情一般意味熟能識
宛如仙子居蓬瀛乾坤晝夜商飈發羅紋細感玻璃滑寒冬
霜露積堅冰凍入書堂已高札今覩神童踵泌郎金門染翰
皆賢良吳仙家世雖留戀少年好入中書堂羨君況是名家
裔前代簪纓翰林貴祇今高步接羲之煌煌聲名播當世我
家譜系毛神童亦曾獻賦蓬萊宮感君墨沼發清興浩歌一
曲來天風

贈冷梅軒居士

熊 夔 一菴
吉豐

夢覺羅浮天地春小軒容爾着精神但存晚節含元氣不向
東風媚俗人似爾性情能有幾任他桃李笑無鄰品題已試
先生行世上紛紛總後塵

義寧州志

卷三十上

藝文詩

四

四百四十五

次韻答家梅軒

邑人 冷 旭 公旦

愛爾中堅外擅芳移根環堵老風霜清竒骨格渾無俗綽約
肌膚別有香塵土豈能污縞素凡花只管媚炎涼到頭並有
西窓竹清白相看耐久長

清水巖山行即事

姚 晁

四面山如畫遙瞻一境天矮松妨小徑密竹暗流泉雲裏荒
涼雨磧邊高下田豐年如可望勞瘁有誰憐

明山觀

邑人 陳 郇 邦達

路入明山景漸佳水杯流處泛胡麻鸞驂高下空中馭藜杖
遙尋物外家石迸靈泉通一竅庭環琪樹落三花我來欲問
無生術不見青牛駕羽車

登天龍堂絕頂

陳 邨

絕頂摩霄漢回陰矮夕陽巔崖隨澗轉新竹出林長石髓寒
流玉山花暖噴香登臨出人世萬慮頓消忘

抱子石

陳昇

蓬鬢荆釵懶作妍望夫化石幾何年教人錯把羸秦怨却在
長城未築先

釣臺

邑人 劉孟芳

一路青山綠樹陰釣魚臺畔日沉沉石間有月明如鏡照見
先生萬古心

訪丹霞道士不遇

邑人 周叔襄 梅月

欲究元元旨來尋隱隱居鶴歸松樹晚螢入竹林疎避俗門
多掩朝元席久虛丹霞還舊處粉壁看新書

經光法寺

義寧州志

卷三十上

藝文詩

四

三百八十五

特地叩禪關禪關異俗寰鶴因巢樹集龍為聽經還香裊烟
霞裏鐘鳴霄漢間浮生應罕到一到一開顏

遊磨劍池

尋幽此日到仙家磨劍池頭景物賒千尺松杉參碧漢半天
樓閣緗丹霞夜聞白鶴歸華表時見青牛卧落花此去天台
應咫尺一溪流水泛胡麻

過吳仙里有感

暫時不到吳仙境一度經過一愴神禾黍已藏新狡兔江山
猶識舊賢人龍圖宅廢基猶在仙子丹成井未湮宇宙茫茫
無限意落花啼鳥送殘春

送鄭用材之任分寧

邑人 周季麟 公瑞

寧踞吳頭控楚尾幕阜西峙獨几几勢連衡嶽走匡廬修水

一泓清澈底山農隨處傍林居耕桑樂業勤耘鋤士氣雍容
尚禮讓衣冠比戶敦詩書曩者曾見烽烟作暴客跳梁門擊
柝詰捕多賴有司良三尺嚴明首除惡君侯循吏漢家賢西
江鳧舄飛翩翩隨身帶得郇膏雨萬家枯朽發華妍聖情孜
夜重民牧臨軒簡拔同夢卜暫屈百里試牛刀佇聽弦歌流
蔀屋勸善有賞罰有刑豪強不敢相縱橫清勤看報三年績
憇彼甘棠貽令名我今餞別心偏喜祝向君侯惠仁里搖鞭
得意出京華一路清風馬頭起

壘金淨刹

幽靜堪修煉雲霞滿碧山黃冠無路入衲子念經還病目渾
如洗羸軀頗覺閑子房曾避穀勘破利名關

南山寄興

義寧州志

卷三十上

藝文詩

四三

四百三十五

每到夜深聞鐘鼓南山寺對月華濃一尊鬪健寧論客萬事
信天誰笑儂最愛僧閒還命駕不妨吏隱亦看松高懷忽起
颺然念丈室惟堪着懶慵

宿南山僧房

僧房假息一枝安睡覺東窓日兩竿竹影橫斜風戛玉舟行
上下水流湍冠雲亭外羣峰秀跨浦橋邊殘月寒老懶山靈
招我飲遙瞻御闕五雲端

釣臺

邑人周季鳳來軒

明月灣頭路清風井上絲乾坤才此老風節是吾師修水千
年跡崇臺兩字碑祠堂枕江岸古木正參差

梅山

昔有梅仙子煉丹憇此山丹成人已去山在鶴空還古樹經

千載飛巒逼九關雲開天未暝有路接塵寰

幕阜山

遙觀幕阜嶺峻極與天齊吳楚從茲限星河入夜低瀉空飛
白練含樹滿青霓獨有樓中客清風入杖藜

艾城

來尋雉堞已烟微贏得孤村對夕暉漢篆盡隨秋草沒遼禽
空與暮雲歸侍中古廟香烟在馮翊遺墟草樹稀立馬可憐
頻拍點鬱葱佳氣尚如圍

冠雲亭

危亭一片插雲端獨立長空數過翰千里河山春柝靜滿天
風雨夜窓寒驚心不覺雲霄遠搔首偏憐宇宙寬歷落孤懷
人未識翩然長嘯倚欄干

義寧州志

卷三十一

藝文詩

三

三百九十

龍安山

南八一心唯有死萬春六矢恰非生不教我任綱常責可使
誰收宇宙名落日孤烟飛鳥沒青山碧石亂雲橫龍安寨上
清霄月偏照忠魂入夜明

贈牛太守赴太原任

邑人

周彥中

宜齋

父老東門擁爭攀太守車喜看京闕近不道晉城紆家便仍
調膳船輕只載書河東凋敝久民吏待儲胥

龍泉山

吳楚東來僅此山天風挾我一齊攀參差古木烟霞外歷亂
曇花紫翠間玉犬識人眠不起胎禽狎客去猶還何時喚醒
塵寰夢也伴禪僧盡日間

馬洲山谷祠

太史祠堂傍馬洲龍陂東下鬱松楸西江詩筆至今在大宋
文章亘古留烟鎖釣臺山漠漠月明雙井水悠悠經過幾度
修蘋藻落日黃雲春復秋

登鳳山

進士張鏊南昌人

鳳山之路與天通假我鳥翼凌長風磊砢截業一恍惚翻飛
指顧層霄中大山稜層岳蓮出小山隱約開芙蓉蒼翠染眼
亘千里乾坤到此真能容鳳山之麓艾子國彈丸耿耿何時
封人文變幻幾今古憑誰再起瀛溪翁旌陽荒唐亦磨滅豈
為藥石回神工鶴背虹梯難着脚此生但與乾坤同羣山對
我情融融踞者如虎盤如龍江牽白日行地底雲辭絕岫遊
太空二三子者索我飲我飲不醉思無窮嘯歌一落寒江裏
恍見匡廬五老峯

義寧州志

卷三十上

藝文詩

四三百九十

北岸漁舟

周期遂

狂風排浪釣綸收飄泊蘆花淺水頭到處傳呼石壕吏家無
租稅也堪愁

西郊牧笛

白石南山事若何春風一曲飯牛歌郊原處處堪芻牧只怕
城中猛虎多

嶼灣耕雨

布穀催春水滿田四郊新雨一犁烟尋常雞卜家家喜共道
今年大有年

泉谷樵雲

雲外新岑野外薇高歌一曲澹忘機怪來昨夜東風惡帶得
殘紅滿擔歸

衡山高贈周公儀方伯

員外鄭善夫少谷
郎

吾聞天高不可升南嶽上應天璣衡絕地七千五百丈祝融
之峯最巉增乾坤開闢自古綱維平三山西北六鰲死然後
陽門反戶東南傾噴空過日乃有此巨鎮儼如天王神武虎
臣矯矯來干城離宮富炎德桂樹常冬榮若非崑崙西起占
樞紐泰山之外誰當南嶽之縱橫芙蓉石廩勢騰擲雷泓風
穴聲礪碣七十二青蓮一一凌紫清行雲膚寸合呼吸遍四
溟鴻雁高飛不能過嗟爾鶴上人胡為抗行雲而上征回風
瀟瀟吹古雪倒翰七澤流三星瀟湘如糸淪洞庭君山萍漂
一點青纍臣帝子不以招而返兮但見蒼梧慘淡鼓瑟湘靈
吾聞地有五嶽猶天五行衡山萬古合崢嶸日南天闕儻或
折尾間汎溢地道何由成吁嗟乎祝融馭無極朱鳥來有憑
義寧州志

卷三十上

藝文詩

四五

五百八十一

夫何為乎絳天芒熒炎海波濤驚天生豪傑須爾用五嶽四
瀆備爾形彌綸藩翰豈比塊然者不然天將誰使之清地將
誰使之寧周夫子崇高通博要如此平生意氣吾與爾

送周方伯入楚五十六韻

南來日月淺歛作洞庭遊宦達多離坼旌旄還阻修人情烏
石雨仙露豫章舟樹直黃陵廟花明白鷺洲攀軒啼老少擁
篲振王侯毒草祠能久瀛溪井尚留賢聲望宰輔伊昔盛才
猷入辟參邦典羣疑反楚囚青蓮分黑白丹筆幹宸旒退食
惟書卷攢眉視貴游坐茲不速化寧自向明投先帝需梁棟
春官雜料膠匪材隨鑿澈是歲辱甄收分忝門生列知懸孺
子酬青雲方契濶白帝正岫嶠公去安邊徼余歸滯故邱數
年鱗沓沓兩地髣颴諸葛綏西土文翁化益州夷酋達禮

樂武弁冠貔貅自古賢人遠殊方聖主詠朔風吹鳥道春雨
下龍湫天共滇池遠人兼泮水幽兩川思几杖六詔賴懷柔
夔俗元來野華封今始流文鶴既翩翩鳴鹿亦呦呦欲見唐
虞理何須猿狄愁幾時卿月照復爾使星浮三晉悲歌切中
原盜賊稠徬徨家室走感激歲時道道在無荆棘時艱任寇
讐終焉脫虎口直擬謝蠅頭天欲昌王室帝能追馬周風高
沙塞暮草歇雁門秋十二事皆舉權豪勢不勾食芻無款段
出牧盡驂騮世待英雄急公宜物色求無諸所胙土馬量載
鳴騶玉節沾應得風謠採未休先聲靖強禦能事屬歌謳霄
漢瞻洪翮泥塗非好仇狄籠充實忝徐榻下何綢願縛南山
虎翻驚北海鷗倚風悲駘蕩望斗念偃僂貧貧鄰人粟寒披
季子裘熱中聞舐痔畢意避犧牛名位爭相笑悲歌不自由

義寧州志

卷三十一

藝文詩

四

五百二十

誰能見客意何以解吾憂夜雨聽希曠春波轉繆悠大廷稽
職業南服趣息庥江漢雄藩鎮夔龍注廟謀雙旌一以遠千
里祇須樞即欲隨黃鵠終知媿禿鶯草深鸚鵡塚天迴岳陽
樓范老端憂樂禰衡招咎尤獨醒心縷縷壯面意悽悽公若
登三事須張竟野粟

分寧道中

進士 范兆祥 豐城人

寒水澗頭千仞崖燕子石下波滌涸獨鞭瘦馬截流去鸛鳥
一聲山雨來

登雲巖齊峰樓

知州 牛鸞

長山如伏龍翠嶺剝雙角嵐光慘白日毒氣深浸脚林黑魍
魎遊草深豹虎薄亂籐不支石時雨寒泉落巖際幾楓樹去
天未一握我來值秋末萬物摧如却羈思語白雲強排不可

度舉手招明月歛然皎日出

夏日過八疊嶺偶成

判官 李松

登臨八疊駭傾欹北指分寧望欲迷修水遶田知野濶白雲籠岫覺天低懸崖瀑布珠璣落夾路篔簹碧玉齊莫笑羈臣嘗險阻吟風到處徧留題

山谷先生祠

州判御 史 胡維新 餘姚人

聞道玉皇香案吏謫來塵世主騷盟鯨遊蹤跡空千載鶴峙精神憶九京桑梓蘋蘩今日事江山吟咏舊時情行藏偶合先生轍瞻對祠堂似識荆

登南山寺

吏目 周節 潁州人

翠律南山寺登臨興獨賒冠雲雄梵宇跨浦靜曇花水落秋江淺林幽夕照斜鄉關何處是極目在天涯

義寧州志

卷三十上

藝文詩

四百二十

遊南山寺

邑人 查仲儒 汝溪人

小寺江邊遠欲攀綠崖結屋異人間松枝屈曲陰浮地澗氣升騰雲滿山巖磴崎嶇移步緩野僧飽煖未心閒新亭風景依然在尚有笙簫送客還

南山院

知州 蔣芝 世和華陽人

春歸何太急忽忽三月終深院鎖濃綠空階掃亂紅武陵桃花岸灞橋楊柳風踟躕已忘世醉卧梵王宮

前題

學正 朱勛 滁州人

長嘯南山頂丹崖映碧溪雲侵衣袂冷天接帽簷齊呼酒松間酌尋詩竹上題興濃歸棹晚秋滿楚江西

鳳凰山

知州 陸統 道夫平樂人

初向名山謁鳳臺一時冠蓋擁雲來霜飛畫戟秋聲肅氛淨

羣峰霽色開莫訝雙鳧游野徑謾將芳菊泛醪杯徘徊佳景
偏增興獨怪鳴騶上道催

清水巖

邑人 劉會

宕室如豐蔀看天若未多石泉懸峭壁山月掛飛蘿犬吠初
驚虎峰迴更擁螺劃然鐘鼓具考擊答清歌

南山院

邑人 查應元 至卿

古刹何年業鞭橋跨碧漪穿雲通石徑畏露避松枝洞暗龍
吟晚花香客醉遲摩挲看古刻猶有宋人詩

織婦嘆

洪崖西來接海昏機杼夜夜聲滿村有時促織鳴四壁月下
令人空斷魂促織促織爾亦樂愁殺織婦無裙着疋帛輸官
沒寸餘開門猶遭里胥縛大兒賣却只幼兒幼兒終歲啼寒

義寧州志

卷三十一

藝文詩

四百三十一

饑堂上翁姑嘆衰老夜眠猶自念晨炊公私之取責何許促
織念我空機杼我願促織化為羽飛入君門作人語說盡人
間萬苦與千愁我生我生無凍餒

幕阜山

以下二首
萬花谷載

無名氏

洞庭八百里幕阜三千尋造化鍾神秀人物如球琳

毛竹山

蜀道稱天險南州號地靈山腰生雨露屋角走雷霆揮扇雲
生岫開窓月傍標明朝一回首毛竹插天青

秋夜微雨

查兆佐 念蘇

夜來微放催花雨快靚園林草色幽籬菊乍開籩酒熟主人
清興憶陶秋

陪李九疑公遊南山寺用山谷韻

知州 謝紹祖 海陽人

追陪仙客喜攀緣
蕭寺憑虛落半天
漱玉泉清堪滌慮
藏龍香藹謾談禪
松杉巢鶴窺旌節
薜荔懸崖繫酒船
莫訝勝遊歸去晚
一輪明月一峯蓮

冠雲亭

知州黃誥東莞人

危亭兀突冠雲橫
賓佐相從此日行
自愧風流非六一
謾將詩句效淵明
釀醪可備修江水
作賦虛題太守名
解道消愁取醉好
何堪凋瘵擁專城

倒屣行贈黎君實明府

僉事史旌賢

孤城負山大如斗
憑陵霽色頻搔首
彈丸不遺刁斗鳴
杜門常稱漆園叟
姓名自誤寧積薪
著述縱成堪覆瓿
忽驚倒屣故人來
舊時好事今能否
菊松相望隔彭川
重見柴桑茂宰賢
秋風便命思尊駕
雪夜能操訪戴船
陌上紛紛豪俠兒
美義寧州志

卷三十一

藝文詩

四

四百四十五

酒一沽錢十千君
看世局苦如此
即吾與爾何有焉
邱壑冷然從所好
作者如此誰窵與
一自中原旗鼓馳
登壇大呼徒竊號
高卧便作羲皇人
漫遊豈羨長安道
豫章本饒干霄姿
冰霜飽歷終堪傲

舟行水涸懷子及

秋江水落使君灘
羈旅風塵到處難
夾岸疑從雲外度
臨流真作鏡中看
淒淒村杵蒼烟薄
點點漁燈夜色寒
總是迷津君莫問
中流一葉自安瀾

晚發分寧即事

吳頭楚尾何處雞
口牛後堪憐欲問徵
君松菊依然栗里風

烟

蓮渚光風習習釣磯
明月蕭蕭自爾一時
麟鳳何人萬古雲

霄

分寧臬署作

吳沈俱萬歷中分巡道

進士

吳顯

漳浦人

分寧山水佳麗鮮儔余來此半載矣羽檄不傳清秋多暇望翠屏而嘯咏倚繡檻以逍遙真吏隱哉爰賦數首聊以遣興

連峯一望半如藍野性偏將泉石耽雲滿松霏風嫋嫋烟深
蘿徑柳毵毵嘯歌幾憶蘇門隱浪迹休誇禹穴探落日愁
人語靜祇應猿鳥獨相參

蒼蒼巖壑似秦餘卜築翻從木石居千嶺泉聲當檻落亂峯
雲氣繞窓虛松門地僻堪移竹石室人閒好著書此日登臨
舒醉眼不妨嵇阮世情疎

幾從高閣俯秋原小徑花深不掩門落葉當風翻樹杪看雲
義寧州志

卷三十上

藝文詩

五

四百廿二

終日坐松根疎簾不礙嵐光入隱几偏嫌鳥語喧自是山川
多勝賞肯因作客遽消魂

吏散鳥啼官署閒自梯高閣望雲山傍簾時見松蘿合背嶺
遙聞牧笛還身托烟霞真是僻興來花鳥獨相關樓遲却憶
茹芝者白首藏名洞壑間

孤城地僻傍林墟幽構新成一畝餘積翠遙臨高閣爽繁陰
落盡小亭疎花間倚杖頻隨鶴窓裏看山屢廢書莫道門前
無問字寂寥應是子雲居

次前韻

進士沈

瓚

孝通吳江人

山光凝黛水拖藍吏事無多野興耽入署流雲春漠漠傍巖
新柳綠毵毵且將隱几舒孤嘯何處扶筇好共探落日散衙
簾更捲祇餘峰壑遠相參

簷溜淙淙積雨餘空堂長日閉門居時危預恐興闕左事簡
無心賦子虛十載坐愁拘吏道一編初學署軍書交遊斷絕
朝參廢自笑嵇康懶更疎

坐擁高牙修水原孤城日晏始通門誰來懷刺青油幕手自
鋤苓松樹根更可結廬投我老不須易地避人喧惟應莊舄
吟多苦入耳能消故國魂

竹徑松堂盡日閒四窓無數翠微山乍欣拄笏來朝爽遙對
飛禽向夕還霖雨浹旬如決溜白雲亭午尚封關峯陰慘淡
城隅暗厭聽鳩聲深樹間

叢棘圍垣傍竹墟綠臺登望渺春餘侵扉雲氣晴還雨入坐
峯陰密復疎不必柴桑還寄酒縱無元草亦耽書幾人作吏
能兼隱何事滄江更卜居

義寧州志

卷三十一

藝文詩

五百四十

鹿源秋色

知州楊維誠子明湯溪

騎鹿仙人去幾秋源中流水響呦呦清風明月扁舟駕赤壁
當年共勝遊

遊南山崖

進士伍士望南昌

碧嶂峻嶒遠岸迴修江春色鬪人來欲從斷石尋黃字故傍
懸崖掃綠苔薜荔一門還促席鸞花三月好啣杯天南天北
頻游目忽憶當年范老懷

分寧舟行入豫章四首

知州方沆詞菴

歷落褰帷意舟行聽曙雞山藏太史宅水似若耶谿削石揚
舲過晴嵐擁樹低故鄉木蘭北春草正萋萋
流水河清淺方舟鏡裏行建瓴喧遠瀨如斗擁孤城寒雨滄
痕淚春雲散吏情推篷聊取適差可濯塵纓

怪石激中流連山雨乍收茲行仍五馬不下愧羣鷗春氣征
衣薄江風宿槩柔浮湛從物態敢為秫田謀
忽有南州役溪行曲曲斜未逢楊得意寧薄賈長沙擊楫辭
江樹開尊對浪花翛然會心處岸鼓倚風櫂

登鷄鳴山寺

倚棹犀津渚連峯郡閣西松門聊結駟春寺靜聞鷄落日疎
鐘動浮烟遠樹齊桃源疑漸近歸路望中迷

過溪口即事

為問棠陰息寧辭嶺路重土風爭雀角崖樹倒虬龍積水迴
潭碧平林點霧濃省方幸多暇歸騎且從容

修江再入豫章逢七夕四首

乍起眉間色翻成刻曲游江縈艾子國壤接海昏侯世態薪
從積雄心筆可投宵征無意緒匡坐對虛舟

義寧州志

卷三十一

藝文詩

五二

四百六十

久作投簪計胡為擊楫行蕭疎仍短髮匏繫總虛名水國生
烟晚江流倒日明敢羞五斗薄家世本躬耕

七月看流火孤舟坐鑠金緒風梢浪急西日曳雲陰簿領牽
行役琴書儻會心空江聊倚棹謾學楚人吟

三仕曾為郡功名似執珪坐看烏鵲渡寧論鳳鸞栖秋色關
山遠天河野岸低傳針有兒女瓜果聚深閨

同楚舒崇孝給事遊清水巖

千尋開雪嶺一徑轉芝田瓊液晴常溼琪花晚故然客疑歌
鳳地石似叱羊年咫尺風塵隔清酣並謫仙
曲洞分南北危崑自古今試賡招隱句差愜壯遊心兀突山
浮磬荒涼地布金回看清嘯處千樹下秋陰

西行雜咏四首

春風回草樹行役艾城西薄俗爭蝸角遙山怯馬蹄夢懸滄
海濶津憶武陵迷莫謂干時拙吾生分執珪

風雨千山外其如春事何驚心華髮短側目畏途多并邑連
吳楚江流合汨羅應慙漢吏蹟謹俗布中和

暮嶺樹冥冥茅茨幾處局雨添雙澗白雲抹數峯青病骨冠
堪挂荒途蓋屢停故園春草遍端愧壯山銘

跋涉甘吾分軒車遠徑長野稀碩鼠詠風異祝鷄鄉寓目空
雲水占農足稻梁三年穰畏壘詎敢後庚桑

壘金山寺

行行祇樹林斜日挂遙岑勝地標多寶名山得壘金松蘿隨
徑密臺殿背江深坐嘯諸天外微風送梵音

義寧州志

卷三十一

藝文詩

五三

四百七十

宿寶山寺

嶺樹烟俱紫林桃花正緋到來成雨宿猶自怯春衣紺字雲
峯出青蓮夜漏微無生從此悟為入寶山歸

受事豫章同僚幕柯汝文汪國輔舟泛四首

水落孤帆隱開尊命友生不妨輸手板聊復慰心旌積氣浮
江暝殘霞捲幔明投林有倦鳥應識宦遊情

少住天涯會方舟棹晚汀蹉跎真馬走慘淡失鴻冥霜氣吹
沙白波光擊汰青無愁江路永遠樹辨宮亭

趨府明朝事乘風發棹謳暮雲停極浦涼月鏡中流故里求
羊徑空江李郭舟羈心君莫問湖水共悠悠

東帶吾仍懶章門幾度過烹鮮甘拙宦衰鳳且狂歌落日江
聲靜新霜客鬢多不知陶令宅松菊近如何

同喻仲宣兄子順兒承笏遊南山寺

東風吹雨忽陰晴曲磴盤雲到化城洞古雙龍藏碎窳林開
萬馬轉江聲鶯花似引行春轂鐘梵偏宜出世情况是臨流
窮勝賞鳳山紫黛鏡中橫

省耕過雙井謁黃文節公墓祠

過兩郊原小隊趨遙瞻太史舊粉榆向來秀色開雙井遂有
辭名並大蘇故宅不堪春草綠荒碑猶對晚山孤渚蘋薦罷
偏惆悵喬木依然響鷓鴣

山口宿查以修衛使莊

東風習習杏花香郭外行春五驢驢路出羊腸千嶂濶流分
燕尾一江長參天樹色叢青靄隔岸柴荆掩夕陽為報襜帷
還少住居然坐對輞川莊

義寧州志

卷三十上

藝文詩

五四 三百八十

黃龍山寺

說法依然古道場禪林雨色轉荒涼何年白馬來西竺故事
黃龍紀武昌載記吳黃龍見武昌即此山忍草春深空繞砌旃檀世遠不
聞香布金總屬人天力願借摩尼照上方

釣臺

穹窿片石倚江開人道涪翁舊釣臺駐馬好尋題字處生烟
漠漠水滌洞

杭口橋

宋章丞相故里山以餘杭得名

長橋西縮水雲鄉桑柘陰陰萬樹蒼草色久荒丞相府名山
猶自說餘杭

銅鼓石

銅鼓守備鄧子龍武豐城

定江巨石當路旁有人疑是南山虎笑漢將軍只沒羽乃不

貫之何足數又云此石名銅鼓上應列宿關帥府英雄一劍
破中壘撐住乾坤鎮吳楚

仙羊寨

仙羊已去何年許我來重作仙羊主呼仙酌酒仙童歌仙花
滿壑仙禽語一嘯仙風八面生仙霞散作千山雨

萬松嶺風雨催軍行

嶺在黃岡洞

應憐西事懸民瘼長呼鐵甲燈前著三程兩程晝夜行千山
萬山風雨惡不妨鼓角地中來自有將軍天上落百戰烽塵
社稷安一怒乾坤星斗錯歸來烹象飲天河何代英雄無衛
霍

金鷄橋

短甲輕兵入武鄉西風吹骨鐵衣涼大幽山下無情水笑問

義寧州志

卷三十上

藝文詩

五五 四百一十五

金鷄舊戰場

以上三首見橫戈集

過丹霞觀

邑人周希令游西

歸鞭漫駐紫雲宮杳杳仙山楚楚鐘世遠三皇文貯壁丹成
五老玉為峯本來著相原非相說到無空色即空欲渡江湖
求羽扇元壇且復叩吳翁

過東嶺

邑人張誠吾

靡靡愁秋征迢迢度東嶺百盤繞羊腸千尋至峯頂天空鴈
陣高日暈桑麻穎瀟瀟風木悲令人惕然省

上鄧武橋

將軍寶劍初離獄騰有龍光射斗牛斬馘定需天下用割雞
寧為潁州留功名一笑卑麟閣月色三更滿庾樓自分傭書
生計拙可能投筆覓封侯

示大版尖秀峯和尚

邑人王天發 汝楫

石級千迴棧崖垂百束茆浮雲連屋角積雪下松梢興發不自覺詩成以意敲薛蘿清磬外久矣絕知交

陶姚尖

千年冲舉憶陶姚鳥道盤空架石橋白鶴朱幢何處去春風丹竈此中燒一行甕內堪藏斗兩叟枰旁有爛樵觸處莊生鵬翼想赤城我亦欲偷桃

清水巖

邑人鄒第子京

九曲神河天上來源頭不許人間猜我觀巖水亦如是忽起忽消一派迴鍊石曾聞石作補移山又見山為開清詩孺子滄浪取好覓心花向佛臺

豫章道中

知州林之翰 爾憲 莆田

義寧州志

卷三十上

藝文詩

五六

四百二十

只道披星慣仍來帶雨行山楓遙送冷潦水亂爭程百感隨湍咽諸艱遇坎生壯山元盡瘁遑問旅魂驚

按鄭氏雋區林爾憲守分寧當凋敝之秋猶善苦吟豈歐陽公得之三上乎如豫章道中云云

抱子石

頂有鸞 鵝石

僉事邢大忠 山陰 人

佳氣鬱蔥光若執亭亭一石飲江立連峯巖業產雲根翠葆參差玉笋出靈鷲嗜竒歛却威終日觀之不欲飛品以龍頭猶似誣思古胡將抱子呼強名不得幻天工九面徘徊眺望中

九日謁濂溪先生祠

不為登高翫物情前賢仰止欲經營三間堂屋中仍處一畫先天舊現成草色入秋生意歛溪聲向夜夢魂清只今識得

真光霽處處蓮花照水明

謁山谷先生祠

當時新進口懸河直節從教百折磨紹聖姓名流落久春陵
翰墨散遺多一肩去國隨行李萬里歸家有釣簞欣羨祁陽
醫市客雪齋相並映東坡

過雲巖有感二首

御史 王應斗 天侯

曇花開徧刹那天未盡林梢一炷烟畢竟化城歸劫火不留

金粟到千年

丹邱千載自成烟那見靈光得屹然萬竈不須營曲突瞿曇

亦是火中仙

贈大湖僧法雨

高僧來自錦城東帶得蛾眉翠幾重杖履雪痕猶未化寒光

義寧州志

卷三十一上

藝文詩

五七 五百一十

直射大湖峯

寧對

周季鳳

君問吾寧事予言敢自休混茫漫無考開闢亦難求地志躔

熒次天文薄斗陬陶唐裔南服虞氏域揚州塗會應從夏孟

盟定入周堂堂盤楚尾挺挺作吳頭南北車輪濶東西馬跡

稠春秋稱艾子

春秋時為艾子國

秦楚屬番侯

吳芮為番陽令號番君地屬番

治澗

蒙新壽

新莽改為艾子

西平自漢悠

漢析艾縣為西平縣

安章紛廢置

晉改為西平

豫武暫夷猶

唐改為武寧

西艾垂千載

艾縣西平郡軍同一瀕

郡軍同一瀕

陳置豫軍俱尋廢

宋陸分寧確宋代

宋皆為上望

支郡襲元首

元陸

國史誇上望

唐史註分寧為上望

圖經失校

龍岡坪

讐

郡縣志皆

寬餘來割裂綿邈費懷柔

都治東南徙

艾子都

西武寧

治在州東

墨黃黝聖鏤

州縣堂

漢唐分長令達魯贊

元疣赤一員元達魯花 侯邁南朝爵宋縣分公侯伯子男知兼少皞

鳩少皞官各祝鳩主教民賜鳩主法制鳴鳩主水土立官非

擾擾布政在優優祿俸雖差等脂膏豈敢偷令嚴絕磐跡吳太

史慈營幕阜 兵銳繫延體呂熙浩平黃政移民粟瞻彭城化

獷咻彭思堂銘民有賴蕭從作肥民求瘼靖亭詠律何道韓

建醒心問春虜騎縱橫急儒冠保障網陳敏識任滄與馭胥

威赫赫趙良淳不祀哲禮悽悽王象之立三賢堂祀聖誤祈

天啟周文勝監戮每夜稽顙北辰祈得阨艱發廩賙倉水旱

徐生勞紀載徐筠作王令費思抽王象之作民戴挽征旆

風流正字侔韓駒以秘書正詩宗大家谷韓駒詩入道繼亞

義寧州志 卷三十一 藝文詩 五 七百七十五

聖鄒周濂屬佐向嚴最向善任典史嚴儒師艾鄧尤艾挺鄧

守今推沈葉沈葉天爵令昔數羅劉劉琛勤謹同知輔黃威嚴

太守牛鸞都周條並整周昂蕭陸惠均優陸普蕭此外諸官

長大都半枉賊宦遊既已述鄉獻亦當搜詩派開江祖儒源

闖聖邱黃山侍中香火開劉陵為馮翊草烟幽鄧通為馮題

石驚人句黃庶題驅奴表國愁金人立張邦昌徐俯挂冠而

驅省元心未副黃給事志粗酬徐禧折獄曾誰右修河不我詆

余良肱辨荆南 兩川茶滷剔黃庶使川三晉甲兵振黃庶

路安撫使郡事悉調理 安邊法陶卞冷應微以直寶章閣知

斷史並韓歐南宮靖一著道演紫陽派朱熹學官清寇相儔

錢買屋無迎鑿馳遠節使虜驚飛輔莫將工部侍郎借禮部尚

之功 茗葉昭清白 蘇頌曰吾平生薦士不知其幾惟分寧孟
為多 覬 萍鄉不競綵 黃大臨為 嚴威聳孟獲 黃然知歸州 顯戮

也 正驩兜 王鈇知湖州 談續詩壇幟 黃談有詩名張安國 光高
逸駕颺 雷友光居家教授 冠裳輕直節 尚黃雍好學 聲價重東

甌 徐俯辟地嶺南胡直儒在 二宋文章會 櫻桃洞宋郊宋祁
館 三揚意氣投 石彥誠見知 崇仁仰洙泗 崇仁教官 新淦植

槐楸 程翼淦 清夜城南賽 黃叔達謁法雲禪師城南 中天砦
上 貅 周天與登中峯 衛參真古樸 張幼文授龍虎衛經歷學

子 建尹獨寬柔 周季邦為建安知縣者老楊某 三史能尊夏
余貞修宋 一糜若决溜 查孟富母病 中丞逐獯鬻壯極伏咽

喉 周季麟為都御史巡撫 興滅昭青史 辭榮對白鷗 先朝立
哈密王屢為土魯番侵奪周季麟撫安 義旗懸日月 黃介胡

義寧州志

卷三十一

藝文詩

五九七百四

德文德機莫以中揚宗訓祝典可姜本道 貞血湧江瀏 彭氏

高烈女皆 介鏃飛毛蝟 介黃雲蚊毒電矛 吳猛手不驅 賑饑榮

聖米 陳帥查雋陳昇查勉已帥 義塚早麥舟 陳鳳岐 忠孝人

倫重 孫余貞黃恒之孝行 詩書世業修 宋以來世家徐黃余

石周查陳 十龍呈宋瑞 瀨茂宗與弟滋湜淳煥 雙鳳愧吳鈞

南山來軒 扶世士多雋濟川才不售 巖穴之士老而不出者

余存耕周 春風開閭館夜雨講天球名豈文章振官非老病
謀鄉惟崇閱閱我亦忝箕裘玉陛登衰朽金花濫結繆一生
多坎壈十省浪遨遊權貴三章約貪殘一筆勾棠陰空自好
問左漫興謳述往頻更僕凭高且豁眸搏詞不能盡漏美或
疑瘦鄉市迂棋局民居簇豆區武崇稱富庶 武崇 壤地非甌
寰孤篠奉為簞 奉仙鄉出 寸田高可耬 高鄉田 雖 泰安共天

澤安鄉異是最高平義同鷹鞬西平仁两市爭看鳳四民盡畏

鷺郡齋洲北立馬洲賢舍水東流盜寇三巡詰杉市定江入調

占兩學哀陰陽僧房僧正穴雲巖道觀道官儀翔毛竹人

持檄南坪馬息鞞南坪金湯儼天險形勝居上游水繞羅神

遠山排玉笋抽幕龍連苦太幕阜黃龍苦竹武鹿會崇修武鄉

鹿源崇鄉咿啞雞唱曉鷄鳴山夜靜琮琤洞鳴璆鳴水南山

迷鳥篆北嶺送驂騮白峻岷廬過幕阜山脈湘深瀆汨由瀆水

入湘汨合羅飛鸞舞株嶼株樹異竹擾蓉幕阜山有芙蓉津

月光何渺犀津有白石橋霞爛忽收安鄉有棲霞橋宋僧夢

久而魚臺絲裊裊山峽獅竇蕙猶猶獅子巖島頓窮猿哭石島

頓筆毛梅飛雁遛毛竹梅青龍插雲漢青龍白鶴潤田疇鶴源

名山石佛路人拜在高泥仙社鼓吹李仙姑雙泉飛白練雙泉

義寧州志 卷三十上 藝文詩 六十九

洞百口轉青旂山口二水千工合黃龍山下有温冷三泉九

病瘳石壁温泉沙灣風雷護仙骨攝仙窟宅定龍湫鳴山出

四時不抱子嚴冰雪抱子護仙飛崩緱護仙鎮州丹鳳集鳳凰

洞不溢插漢九龍擎九龍木變山流血血木江浮石泛球蔡伯喈

峯攢形金壘壘金石裂綻錦蚪石龍兩鬼因爭界六丁遂畫溝

舊傳紫陽觀石侯二神旌陽山似戟旌陽山名瀑布水如油紫嶺

孝思淚可菴哭父黃池風雨鯁黃龍山有湫池中龍泓水汨

汨龍泉嶢穴風颼颼嶢巖洞外聳怪石清水巖寨前開高箒

龍安杭山雲偃盖杏水穀呈緞衆縞爛堆棗多紋競裂榴土

田數千頃租稅三萬轉城郭人烟輳橋梁輻轍蹂方塘開池

窖高堰吼溪彪食貨通商賈徵需走置郵雪翻雙井茗俎實

百川儵修水有獵戶尊熊鹿農家賤麥薶丁田秋稻熟丁田

魚名儵

亥市晚烟浮亥市即白葛非唐貢黃金定漢不村盤筍薇嫩

新酒白紅筍鮮鮓饒風味香狸勝海羞冠雲亭雁掠環翠閣

山囚杏苑青膚合桂香綠髮蘇馬蹄膾拂北舍驛藥籠蠹蕪猶

藥局場務荆榛長酒稅務梁口稅場查倉廩舩舫舊各鄉

貯租稅便恩瑩形獸立御堊墳墓聳楔動霞攸牌坊草翠蓮翁院瀟

書院稍黃桂老腰山谷祠兩巖剝古像清山水巖有瀧雙井窺深

洞龍捧恩光誥周氏恩客鳴餘及騶州後堂有宵燈小廟雜

午渡深潭勗激俗曾碑在曾子固雲藏書谷序留藏書閣黃

藏修文爛具秀水書屋孝友記逾鏐孝友碣聳崇正柱崇正題懸

覽德球覽德喜争曾自葶拔萃更誰求桃李荒櫻洞黃氏櫻

二書院牲醪隱馬洲吳觀築馬洲精麗譙更鼓響虛直後人樞

堂直毛幕集嘉詠毛竹幕清鳴非亂啁清山水巖有山谷詩鳴

義寧州志 卷三十一 藝文詩 六 七百

傳經謹人鬼黃叔敷註春秋講義雷光霆抗疏羞棘猴黃庶

徐禧治策黃臺詠天鯨激臺源諸境水吟海怪菟鳴水洞清

有詩亭堂艷屈宋逸老亭鈞亭徐氏書院茶劍韻笙篴雙井茶

諸賢寒燠毫端轉乾坤秘句培僻荒因揭置賢達實扶搗儒

術開窻窻後生沐稠疇人情敬宦達財物等蜉蝣俗重宦達

職有罷去或陞遷者皆設絲帳盛筵餞直領方巾古飛鬟拋

髻影深閨魚笏遠鄉薦鹿鳴呦坐客卑西北主人重榼卮祠

堂嚴俎豆月旦賤蛛蝥強賊生吳汝良民便鎧鏊村村掾甲

胄户户困糧餽正德五六年新吳華林馬磁建昌安魯虎哭

仍哭永蛇憂可憂磨刀追鼠狗滿地盡豺彪狼跋禾麻長賦

平藪澤膝善旌風自厚身正俗無忤白屋誰堪拾青天獨望

床上官因地僻終歲忽民慘園蟄存葵藿井蛙嚇蟻螻壯心

徒扼腕老眼只登樓時事又如此君當達冕旒

義寧州志

卷三十上

藝文詩

三十八

義寧州志卷第三十上終

250.53
136
1/6

義寧州志

三十卷下三十二卷

藝文志

國朝詩

書目志

雜記志

後序

捐貲姓氏

冊六十

義寧州志卷第三十下

藝文

詩

國朝

論山谷詩

尚書王士正

阮亭新城

一代高名孰主賓中天坡谷兩嶙峋
瓣香只下涪翁拜詩派西江第幾人

晚眺

知州

徐永齡

遼陽人

乍晴高縱目天地半浮空絕壁苔痕綠
遙岑日影紅洞庭湖不遠彭蠡水猶通
百里西安境雄居吳楚中

過抱子石

抱子何年石嵯峩向水湄雨流千古淚
烟鎖一時眉有婦

義寧州志

卷三十下

藝文詩

三百七十

知兒苦無人憶母慈如余浮宦海過此更生悲

重九前二日至梅市樓居偶題

徙倚層樓日未西村烟面面白雲齊
河陽漫數花千樹彭澤閒看柳一堤
勞我簿書偏不輟到天峯嶺亦難躋
籬邊菊趣重陽近香促蠻牋強自題

修江舟子

修江舟子最為難山是奇高水是灘
青纜時須牽絕壁赤身冬亦浸狂瀾
朝炊脫粟臨風噉夜枕輕蓑帶露乾
似此生涯寒到骨也知義命自相安

南崖藏龍洞歌

州判

鄒宏志

烏程人

南崖隱隱雷聲宵洞口石裂龍尾掉
空巖零落噴珍珠化作蓮花色何皎
抱琴偶過釣磯邊流水高山落眼前
清寒

彷彿瀉石髓幽曠真如坐玉泉火鬢雲鬣從空下盤旋難
免葉公詫虬松鱗甲更蒼然也似蜿蜒神物化山僧歸來
杖履輕飄笠蕭蕭尚有聲忽然供鉢湧雲氣雲雨還從鉢
内生

立秋後過南山厓留題

閒身殊悔又之官只有看山興未闌放眼喜當秋氣爽攜
筇來踏葉聲乾雲生石壁千巖暝風送松濤一寺寒僧榻
盤桓機事少臨流高枕羨魚竿

分寧竹枝詞

南山峭壁似衙排北牖青山又跳來雲霧曉看多變幻碧
陰常待午餘開

才近清明斷雪天那知寒燠竟相懸有時乍熱穿荃葛三

義寧州志

卷三十下

藝文詩

二 四百二十

日運陰又着棉

土瘠山寒菓未佳清芬那得到冰牙碧桃味淡楊梅小可
口除非是枇杷

山田曲曲有高低雨後潺湲路不齊阡陌層層皆作堰碧
波深處浴鳧鷖

遊版峯

邑人熊廷瑁百子

山人師意筆橫卓潑翠堆青圖五嶽雲度分剪薜蘿衣烟
消半淬芙蓉鏗滴瀝洞嵐帶雨俱嶙峋石磴階天若葯熟
杵間鉢飲虹丹成羽化瓶飛雀破笠枯籐常住禪老猿瘦
鶴聆經鐸尋幽籟擁竹當風選勝濤隨松在壑濛濛絕巘
復霏霏浩浩中懷還落落攜來長劍倚殘霞摘取星辰懸
肘握只今橫弄苦撓槍小草方切澄清畧何年銀漢洗金

戈洞府安眠無扃鑰

洞山寺

一寺藏山洞洞中復有山砌巒清欲滴鑿澗碧何潺梵古
僧來韻林幽鶴住閒天空無一物惟見白雲還

壘金山寺

邑人 余應荃 蝶莊

深深多寶寺蒼鬱氣無極居山愛前峯雨餘勤登陟遠岫
列青螺麥隴比如織松下人一豆遐矚窮目力偕我益者
友收視反靜默活活聽流泉幽與鷗聲值俯瞰樓戶通畫
舫堪偃息上山屋在腰下山屋在肋足勢未敢放悚然履
劣崩

遊黃龍和山谷韻

桐帽棕鞵謁祖衣秋幢悵晚立斜暉淒涼法窟聞龍泣漫

義寧州志

卷三十下

藝文詩

三

四百一十五

滅靈源看續歸諸佛自來追勝蹟三關我欲暢元機頭陀
競說荒唐事問向涪翁是也非

遊幕阜山

邑人 姚修經 石渠

幕阜峯橫古艾西峻嶒翠聳碧天齊瓊田一草超吳產澗
汨雙流到楚溪神禹靈碑蚪蚪燦山上有大禹治水至此碑仙翁石室

鼎爐迷葛仙翁有石室祗今法窟黃龍著自掃莓苔覓舊題

和陳蔚菴印須渡

扁舟江上載琴書閒與浮鷗日對居兩岸烟花春賭酒一
竿風月夜鈎魚停橈愛繫陶潛柳泛宅邀吟魯望廬肯把
東津稱樂國桃源莫問武陵漁

洞山寺

邑人 熊廷幹 貞夫

一天秋色淡松花獨鶴歸來帶落霞石洞草青僧入定白

雲飛出護袞裳

分寧懷古

州同 胡錫熊 會稽人

溶溶修水出分寧萬壑千峯入眼青雙井茗茶春自早一池菡萏靜猶馨此邦人物多翹傑在昔詒留有典型最是襟懷堪遣處清秋月上冠雲亭

瀛溪愛蓮池

池在州判署中

州判 繆象衡 如皋人

曦輪馳駛幾何年靜撫遺編見昔賢百代啟蒙圖太極一時托物愛池蓮中通已絕纖毫蔽外直無容尺寸牽且向修江標淨植何殊溢浦濯清漣簿書期會非吾事霽月光風別有天微祿幸聯芳轍後半窓綠草自芊芊

書南厓順濟龍王碑後

邑人 劉顯祖 寧州

我看明月灣頭字瘦硬通神如公詩公詩瑰瑋妙千古公

義寧州志

卷三十下

藝文詩

四百八十

字蘚剝石離披在昔南山師清隱君曾為作順濟詞大筆剗利如錐畫鐫刻不殊龍岡碑潭底龍眠抱砂礫乍聽晨鐘睡初覺光怪陸離湛水瀆奮鬚露爪來相攫一自沙沉鏡畫埋夜夜紫氣凌星宿公去無人作水檄老蛟雄據螭盤躩龍宮至寶難久藏一朝浪湧碑浮洛元豐距今七百年字字抉石神工鑿璞隱荆巔價連城劍埋豐獄光盪獄吾儕著作藏名山檢牒有人司鎖鑰石碑石碑汝何奇磨洗仍壽南山陸南山不騫碑不移

乾隆辛酉季夏二日風雨大作翼日聞銅鼓營蛟水暴

漲淹溺無筭賦長歌紀事

六月初二火雲沸赤日燒天當午未大冶煮金金欲流窟室難將吳牛庇須臾風自西北起縱橫叫號走山鬼白晝

沉沉如昏夜飄飄歛忽無定止樹老如虬根如斗盡付封
姨作傲帚繞地盤旋舞不迭軒然放哨疑虎吼如拳山雨
擊虛瓦百萬金鼓從天下震雷轟轟助其威倒海排山天
地啞獨有長松聲格格怒欲張拳奮髯戟飛濤故故與雷
爭大似孤延鬪霹靂生平浪說越潮怒區區溝澮不足數
此夕驚濤竟何如簷瓦飄颻蝶舞日前銅營夜走蛟平
地水湧十丈高深閨夢斷一江寒裸身漂泊無人撈毋猶
抛子置乳下娘持女手死不捨無貴無賤委泥沙淹淹只
當魚與鮓舟車多險陸處難茫茫何處覓安瀾但令寸心
少豁谷不須剡道平巴山不見洞庭波兮君山雨舟子漁
人稱樂土不見劍門之險干青雲逋客紛紛走朱輪我時
正入邯鄲道龍鬪虎爭都不曉醒來山妻說怪事一片離

義寧州志

卷三十下

藝文詩

五

四百八十

迷夢草草始信希夷神妙訣任爾風濤歸寂滅仰看明星
復在天銀漢無波光皎潔

春日道經馬祖湖

肩輿分小步朗朗出前川菜老香鋪地苗新綠滿阡帘開
村店酒雲翳野湖天馬祖何年到心心印水田

杉市司古署二首

一官如小隱庭際落松花蟻店營荒市蜂房放晚衙灘危
聲到枕署冷夢還家秋氣涼生樹黃昏集暮鴉
古署連邨塢漁樵曉市喧官閒門不啟地遠吏常尊石破
青苔岸沙沉古樹根一篙秋水裏錦浪逐霞翻

過龍安寨

歲暮苦行役黃昏馬骨寒冷雲迷磔口宿霧鎖龍安樹匝

旌旗合峯圍劔戟攢男兒等死耳生氣拍征鞍宋黃介
殉節處

小路口訪潘使君拙叟逸事

行行小路口駐馬訪先賢不種河陽樹來培蜀國田渠功

周四載水利注西川使君尹成都
興水利築堤石鼓留遺蹟摩挲出紫

烟

泰清過冷學士覺齋故址

學士何年宅風流滿泰清月從樓際聽花向筆頭生有曉
月樓

并詩閱閱貽吳壤枌榆近楚城蹊山多積雪詩思寄遙情

西平故城

西平尋古蹟疊嶂馬頭青石砮殘邱瘞寒泉九井渟雲屏

開鳳翅水郭列獅形誰化歸來鶴山城半杳冥

石門洞

義寧州志 卷三十下 藝文詩 六 四百二十五

混沌何年鑿懸空劈洞門泉飛穿石罅樹古夾雲根冷翠

侵衣溼幽崖障日昏重園森劍戟疑是海雲屯御人扼險
禦寇處

僻幽無路到石磴匝苔生蛇蛻蒼藤挂鶻巢老樹擎洞昏

來嘯魅林密走飛鼯罕地驚人處空山啄木聲

過東嶺

東嶺崎嶇路崇岡夾道松去天剛一握拔地已千峯瀑界

三條白硃懸一點紅頂有水簾
懸硃諸勝村烟娛目處蟻蛭入雲封

脉灘天柱峯

脉灘誌載巨石一峯壁立千仞插漢干雲不可階升土

人猿捷者閒一登陔俯瞰魂慄實為銅營水口文峯傍

有飛來石夜合山凌庵石室諸勝俗以麥果名山晒鞋

名石猪頭名峯大為山靈減色余庚午冬過其地延岸

遠眺筆筆奇峰其秀拔處有荆關寫不到者因更其名
為天柱峯而夜合飛來仍其故號偶成一律為山靈解
嘲

一柱擎天入畫圖亭亭壁立鎖烟孤脉灘浪洗巖根瘦岫
嶺雲籠石佛腴峰自幾年渾合壁鳥從何處化雙鳧分明
卓筆凌魁斗拜文還須米老呼

和余燕菴南崖韻

何人絕頂溯風流山谷臺荒薜荔幽峭壁蘚侵遺墨隱空
潭雲破古碑浮亭舉倚樹飛鼯鼠閣迥招僧話牯牛向夕
歸樵爭晚渡石門烟雨到城頭

欄樹三灣

一灣相見一灣還問是桃源第幾關澗水杳然穿石放亂

義寧州志

卷三十下

藝文詩

七 三百九十

飛花片到人間

送蛤大師之寧州

檢討

毛奇齡

西河
蕭山

道人渡江去拂衣隔人羣將攜剡川雪一卧匡廬雲妙指
天邊落清談石上聞 內廷供奉久長憶

聖明君

蛤公曾延
住構園

永夏辭天姥新秋去若耶題詩存八正飛錫近三巴鉢隱
龍宮樹衣裁鷲嶺花天崖相問處不記有恒沙

東土栖支遁南朝重惠休金臺邀

翠輦銅椀賜紅樓出伏山前虎行隨海畔鷗宗雷舊同社相

送上寧州

修溪石室好此地得精廬編戶知僧律長廊貯佛書
齋聆幽贊會常住淨明居誰道秋江上瞻雲過太虛

修水行

僧本園 蛤菴

昔居耶谿側今住修水灣採蓮不離水採薪常在山山水
諒不厭平生相往還

宿雲巖寺

不緣親利涉安識濟川功 時小梅嶺下乏渡因截流而過 山散殘虹雨鴉

翻亂葉風雲霞穿雉堞烟火夾禪宮一錫鳴天際長期祖

道通

過兜率張商英問法處 時未住之前作也

繼遠須名勝登壇履舊塵我來酬夙志山亦解留人蝶夢
空禪榻蜂房贅佛身誰為張運使重際此芳辰

應朱肯堂兜率之請

一署雲根下千山總到衙裁書遺苾士覓水種蓮花課減

義寧州志

卷三十下

藝文詩

八 四百一十

租庸少官閒歲序賒相期心正密拂石望行車

上谷曾三到陀天豈一行地從吾祖闢法藉宰官成高座
搏獅解荒崑怖鴿情蒼松原有意長作海濤聲

遊金華寺

陳言吉

閒尋溪曲過金華香送茶蘼滿架花僧樸相逢無禮數趙
州禪意一杯茶

貞女湯招姑

知州 張耀曾

扶輿清淑氣偏鍾在婦女竒節本庸行一一堪告語有女
曰招姑弱齡方十五生長在農家所習惟麻紵耳不聞訓
誠身不親鄒魯豈知性自良不與裙釵伍維爾三歲時蹇
修通系譜未及賦桃夭裂斷鴛鴦杼悲哉失所天視殮空
延佇誓俱從地下同穴予與汝總由見理明決機乃如弩

知死重於生視生輕如土其生不足榮其死為得所行當
達

九重綽楔貞千古

濂溪書院

精舍名藍擁薜蘿修江千載尚絃歌胸中太極涵光霽池
上秋風老芰荷泗水一燈輝赤縣雙祠百代倚崇阿每慙
未辨分寧獄展拜庭前汗頰多

過毛竹山

邑人陳昌言汪津

曉起出林麓隨山路幾灣方欣來坦道又怯過層巒雨氣
生巖壑雷聲走石灘隔溪人語響村屋野雲環

抱子石

鐵作肝腸石作胎年年抱子立江隈隔河欵乃篙聲響微

義寧州志

卷三十下

藝文詩

九三百四

問阿爹幾日回

釣魚臺

文節高風翳草萊野人猶識釣魚臺夜深明月沙鷗起疑
是先生放艇回

早發嶢岩山

石磴尋河路轉西山間好鳥不時啼野花鬪盡溪邊色一
徑香風送馬蹄

雨中登南山厓

邑人陳侃言

嵌空樓閣勝蓬瀛為愛登臨不待晴風起濂溪來小院雲
生龍窟擁孤城還巢山鳥依林響罷釣漁舟隔岸橫踏碎
莓苔尋古寺翛然梵唄數聲清

拜康敏公墓

名仲道

邑人查文溥盛川

批鱗拜杖叱天閻垂死猶留鐵石腸一卷彈章驚輦轂千
秋尸祝盛汀杭恨遺直節拋青史愁絕忠魂泣白楊幸有
蘇亭相洽比數聲笛鶴慰泉堂

杏苑亭

邑人冷時梅惺堂

山前十里礪潺湲亭苑荒涼思渺然野竹低昂幽屋外天

桃開落小橋邊

黃泥坵村杏苑橋朱靈齋有記

涪翁屐跡經蕭寺坡老吟

懷入逝川幾度樓頭聽春雨杏花流水到查田

來蘇亭

邑人查文海百川

小渡坡仙喚蘇亭結構新始知今古事終愛讀書人我意
尋山谷時傳訪潁濱岸花連石笋掇薦勝淇蘋

藏龍洞

方菲

何年龍去洞猶存斷岸長留爪甲痕黑雨疑迴滄海窟白

義寧州志

卷三十下

藝文詩

十 四百四十

雲閒鎖碧山門僧無機事野鷗狎客有詩催蘿月魂聞說
松濤常撼岳蒼虬百丈欲飛奔

家園雜憶

邑人周孔從白亭

月圓犀照月月破犀沉水三載蘆溝夢直到犀潭底

犀津

香山老居士柏堂雜竹閣祗今留瓣香開亭看雲鶴

白亭

傍閣一株松霜皮半枯槁長伴著書人風雨龍鱗老

枯松

小窓秋氣深夜靜發幽響坐月藤花前憶月梧桐上

梧月上

清泉注半池小島波心起却笑環遊魚夢夢幾千里

半池

上有鷄鳴峯下有犀潭水欵乃雜漁歌寺鐘半夜起

鷄鳴峯

瀛臺侍宴恭和

御製元韻

詔啟蓬萊集珮珂西京酺賜協時和高秋早浥金莖露樂歲

先登玉藉禾苑柳影隨

仙仗合池荷香繞

翠華過遙從畫鷁瞻

龍袞五色雲中動鼓歌

水閣風亭面面稠還循曲澗看花浮碎金竹影丹崖繞
漱玉泉聲碧竇流鶴舞松陰隨駐輦鷺飛蘭嶼趨迴舟
玉堂漫說蓬瀛侶直到蓬瀛最上頭

望裏翔鸞曉色媚光凝

黼座擁祥烟時將乾惕承

天貺特許賡颺近

御筵鎬宴重從周室紀汾歌曾自漢廷傳我

皇樂愷思

義寧州志

卷三十下

藝文詩

十一 三百一十

文祖湛露息深媿昔年

碧漢昭回

睿藻留泰交堂陞共賡酬雲窻月宇聯佳咏玉露金風賦好

秋柏殿乍瞻分錦字

仙毫重覩燦銀鈎蓬山處處欣遊豫

丹詔宣傳徧十洲

遊官溪

高齋上與白雲齊村落深沉列岫低短短桃花紅遍野遙
遙柳色綠當溪烟中釣艇魚吹浪林外秧歌鳥和啼怪得
小僧忙入寺一聲鐘打夕陽西

官溪竹枝詞

鋤犁趁雨傍山阿牧豎騎牛踏水過一望野田新綠徧栽

禾不敵種棉多

清水巖次山谷先生韻

盛樂水濱
豫章

萬怪集重門寓目皆奇好有如編衆玉一筵詎能攷石髓
自然凝何事燒丹竈由竇來清風禪元一時掃
洞石既做詭洞水復清好有石巖溜下八音齊拊攷我欲
割蓮花煮之仙人竈苟無渴與饑塵根從此掃

南山崖

稜稜蒼壁入空盤遠勢全收到石欄山水我來新揖讓文
章谷老舊風湍一汀烟柳連春暗無數高峰接雨寒呼吸
已通天帝座狂歌不礙切雲冠

冠雲亭下古莓苔江水江花幾劫灰裂畫龍碑洗沙石侮
波蛟爪斷風雷百年春老棠梨謝三月烟濃薜荔開我欲

義寧州志

卷三十下

藝文詩

十二

四百四十五

題名千尺上登高終媿大蘇才

長至後五日對溪七子招集南山崖喜得再遊書此紀

事

編修 熊為霖 鶴橋
西昌

南山有真性遲我來重遊霜氣蕩虛碧洗出蒼崖幽前者
殊慷慨今此為綢繆摩挲錢色僻一一細校讐薜荔向我
笑靜與天倪謀有如故人面一日思三秋縱勢再延攬坐
我山外樓谷老古先輩瘦筆盤雲亂石剝字不滅氣約神
所留吾輩肆歡會山水互唱酬暝色薄天翠遠浦歸漁舟
杯盤已狼藉洗盞澆青邱大雅如可續努力期媿修

抱子石

抱子江心立江流日夜東月眉愁破鏡石髮蕩西風骨立
還如此情源不可窮好將離恨水倒影照歸鴻

過桃樹嶺

青布裹頭肩荷鏡漚麻纔了又漚藍棚家血汗經霜露茅屋三間月一巖

題周太史白亭先生風雨吾廬圖

彭湘懷 漢陽人

丙寅秋遊都門白亭先生屬作風雨吾廬圖越明年余將買策南歸先生並出絹素申前請今春將拈毫以報而先生已於去臘底赴道山矣思所以抒情者不得因勉為此圖寄令嗣張於靈前以當掛劍之義俾同館諸公暨道義文章之相好者同和焉

春來一雁到林邱試展生綃淚更流何意長安車馬外半樽清酒竟千秋

幾椽破屋亂山中辛苦難忘雨與風鄭重為君圖此幅遊

義寧州志

卷三十下

藝文詩

十三 三百八十

仙好過鄱湖東

學士 顧汝修 華陽人

難憑宿草弔荒邱苦憶蓬壺第一流樽酒聯吟餘韻在亭

與余及同年輩唱和最多年華逝水幾經秋

為寫平生一傳中 白亭既沒余為作傳龍門史筆愧遺風人琴盡後

留圖畫風雨年年破屋東

主事 余騰蛟 賓竹豫寧

風風雨雨暗荒邱天半危濤咽不流絕壑雲蒸山影動蕭齋岑寂獨尋秋

不堪回首夕陽中脫手長安雨又風最是可憐生別後故人魂赴玉樓東

熊為霖

鸞亭翼翼小村邱
兩水當門夾鏡流
風雨可憐吹萬木
玉人無夢到清秋

人在襄陽畫影中
一簾寒雨一亭風
家山剩有歸魂約
游戲烟雲過海東

編修 蔣士銓 心餘 鉛山

十載鄉山正首邱
京華同感逝川流
誰知未了菟裘願
身後圖將老屋秋

招魂補畫素綃中
一樹哀蟬哭晚風
此是小剪山下路
水聲嗚咽佩丁東

當時詩筆比清邱
聞道涪翁壓輩流
戊辰入都值先生甫下世 贏得驢

車過舊宅故人爭
感宋墻秋

曾拜詩人總帳中
十載雙井想遺風
明年雛鳳棲阿閣
仍

義寧州志

卷三十下

藝文詩

十四

三百五十五

住桐花小院東

正詹 陳桂洲 修堂

寄囑霜綃萬壑邱
生前死後總風流
只今贏得遺圖在
縹

緲魂飛世外秋

西清一夢六年中
夜雨聲寒落葉風
為向草堂呼不起
誰

人續唱大江東

舊盟心跡隔山邱
淚向鍾期逝水流
往事低徊圖畫裏
白

楊衰草幾經秋

仙人久赴碧霄中
淒斷寒廬雨與風
化鶴可堪重回首
孤

騫雛鳳起河東

大學 彭元瑞 芸楣 南昌

一間老屋傍林邱
風挾泉聲樹杪流
六載京華千古夢
夢

魂飄斷故山秋

剗馥殘膏在眼中祇從圖畫見遺風傷心絕筆標題在逝

水何緣得再東

謂涂石溪先生

主事

張華甫

實園豫寧

夙踞蓬萊第一邱六年青鎖羨風流花磚影没人何處遠
水長天一雁秋

閒將遠岫列窓中一枕松濤萬壑風別有襄陽難畫處漁
燈數點水雲東

斷崖深處覓浮邱人踏溪烟渡淺流籬下不栽居士菊故
山風雨為誰秋

輞川精舍畫圖中石徑雲低薜荔風夜雨一林秋色老詩
魂疑過板橋東

義寧州志

卷三十下

藝文詩

十五

四百二十

瀟溪山谷祠

邑人

朱之麟

靈齋

周黃二先生建祠江上地瞻禮步前階動我憑弔意理學
首數周大啟往聖秘動靜互為根陰陽涵妙契疑獄片言
剖精神過老吏風月擬襟懷庭草自交翠黃敦孝友行古
人堪追配直筆效董狐權奸勿少諱斥逐歸九原凜凜有
生氣佞史與謗書是非誰能易於哉兩遺影耦坐允無媿
踪跡不相侔而為斯文貴以此隆明裡幽光顯奕世

曲池懷古

戴公石屏鑿曲池騷客來遊賦新詩吟盃灑向清溪水前
朝文物亦堪悲君不見岸頭草色碧萋萋經霜零落嘆無
遺又不聞枝上靈禽鳴不止若對人前惜芳時往者勿還
新者故微名薄利等朝露蘭亭勝會事茫然桃李園中春

已暮祇今惟餘月一輪夜半精光遙相注

抱子石

阿婦誰家偶昂藏立道旁懶梳新樣髻猶戴舊時粧枕席
鄉關遠息勤歲月長願言離襁褓代父戍遼陽

南山厓

南山突兀舊標名路窄還依薜荔行烟裏篋管圍佛寺風
傳鐘磬入官城櫺中鳳獻千尋翠檻外修江一片明自是
祇園居咫尺人間萬慮灑然清

龍安山

勝國鄉民曾避兵儼然天置一龍城踏開青嶂乾坤濶掃
盡紅巾鉦鼓鳴翠竹千竿棲霧隱蒼松百尺綴霞明桃源
故跡無人問祇為中原息戰爭

義寧州志

卷三十下

藝文詩

十六 四百

東西園

戴石屏
載酒處

川原瞭歷滿蒼烟為遡芳型思渺然半畝清池留古蹟兩
園勝事到今傳花茵鳥語呈歡會雲影山光入錦筵載酒
高歌人已往不堪愁絕夕陽前

翠微墩

纍纍遠阜列重圍繡閣珠簾捲翠微載酒綺筵歌後苑
農佳詠步前徽石屏憫農詩當
時方之聶夷中清溪似帶園林舊古木干
霄臺榭非勝事當年誰再續寒烟飄渺鷓鴣飛

銅雀瓦硯

邑人陳
鏌對溪

何處望西陵無復舊臺榭美人埋芳草片玉存古瓦幾經
冰與霜遺茲千載下淵然發寶光蘸墨寒濤瀉誰鐫古銘
詞遺音仰大雅姓字依稀識昔我同鄉者上鐫黃
山谷銘觀此良

非偶摩挲不忍捨死者如可作應感物幻化昔覆在崇臺
今置在精舍

清水巖

邑人陳豐敬舉

幽巖深處石崔巍四望玲瓏繞翠微絕壁懸鐘鳴夜雨高
厓裂竇漏朝暉莓苔半蝕游仙篆薜荔都成古佛衣靜對
悠然無俗物清泉活活漱危磯

同繆廣文遊南厓

一峯橫亘水之濱蒼翠痕分白石鄰日射山腰呈鳥篆雲
迷洞口護龍鱗讀書深院人何在題字危磯跡已陳竹杖
棕鞵遊興劇憑將小酌坐花茵

見田間力作感而賦此

知州許淵 樵香山陰

義寧州志

卷三十下

藝文詩

十七

四百二十五

生產計四月插秧天退食多慙德空懷沮溺賢

停訟後偶作

楚天初過雨簾外盡雲峯入夏黃鸝老當軒綠樹濃政非
能簡易性本愛疎慵只此焚香坐毋令擾野農

村行

鶯啼村徑僻雨釀一林烟野水高於岸春山綠到田桑農
是經濟犁犢好周旋願爾民無訟熙熙擬葛天

重刻山谷全書紀事

知州宋調元 理堂元和

修水探文淵英華超北宋過化來瀟溪千仞攬翔鳳風月
妙品題圖書誰伯仲光霽涵胸中魯直能推重美玉與精
鏐坡仙欣目送一篇薦士表文行已兼綜黔宜任間關夷
險不足動砥柱橫中流後學有折衷七百年吾道辨

香共祀典迄未崇奉祠失系統遺書嘆飄沉墜地增深恐
鏤版忽重光推挽吾從衆展禮肅衣冠哀然陳雅頌從此
寰宇中名經千佛供

己巳九日宴集南山厓

邑人熊高福 雪研

且踐登高約秋風石磴涼輕烟迷斷岸古木挂斜陽花與
人俱瘦詩因酒更狂杯盤狼藉後片月下滄浪
性僻耽山水巉巖捫葛藤客懷閒似鶴秋意淡於僧絕巘
人偕陟荒亭我獸登振衣千仞上雲壓帽層層

遊版峯

窮險尋仙跡紆盤鳥道紛入松身滿露履石足生雲猿嘯
臨風聽花香隔澗聞峰頭延遠眺玉草氣相薰

酬瀟山蕭掌教遊南厓

蕭名之禮
孝感舉人

邑人劉學俊 對山

義寧州志

卷三十下

藝文詩

六

四百三十

置屋懸厓上遙遙壯斗深撥雲披佛面背日過江心載酒
人何在迎風樹欲森此山城郭近稚子也能尋

贈別蕭掌教

士民不失望 恩詔下林邱有酒與君別無人解我愁山
移湖口樹水落洞庭秋得職懷山甫因風想許由

春日讀書鷄鳴山寺

邑人周學山 開庾

山窓岑寂探真元曲徑蕭然別有村花氣薰殘蝴蝶夢春
山啼老杜鵑魂酒能破悶顏先醉書可消愁眼易昏靜聽
鷄鳴分舜跡夜深燈火細評論

禪房真是化人家坐我青氈興倍奢野水綠侵橋上竹山
花紅接嶺頭霞題來蕉葉摹懷草步到經臺味法華怪底
俗塵無處入松風漠漠白雲遮

秋日家居以詩代書寄呈二家叔西厓

別後音書寄幾緘客冬猶憶引征帆夢回犀浦雲千嶂秋
到蘆溝月一巖得意喜公懷紫綬多愁憐我滯青衫明時
莫負蒼生望五馬應須整轡銜

拜黃山谷墓

青牛騎去化仙真節義文章死後伸墨浣西江傳法派天
留壯宋作詩人一棺幸洗宜陽瘴雙井誰扶大雅輪明月
灣頭秋色好烹茶惟薦白芽新

秋日跋先君風雨吾廬遺圖後用彭念堂先生韻

風滿寒山雨滿邱百年人事水東流傷心欲賦招魂什梧

葉窻前月正秋

梧月窻先君讀書處

太史遺墟竹一邱雙橋人去淚空流自從劍履辭金殿苦

義寧州志

卷三十下

藝文詩

九 三百九十

雨淒風十二秋

丰標如在畫圖中幾樹饑烏泣晚風南岫依然人不見詩
篇空貯石樓東

十載清名翰苑中何堪秋雨復春風惆悵仙蹤何處是不
知南北與西東

鹿源山

訓導尹昭勅西橋上猶

翠壁丹崖尚可尋洞門雲鎖護松陰仙人白鹿歸何處流
水桃花見道心

九日登道嶺

邑人胡宗定此園

招遊尋勝跡踏破白雲高寺拔孤峰起僧驚一笑豪烹茶
無世味種竹有清操蔓引松鱗老風來自抑搔

過西峰寺

一去離城十里遙西峰積翠上干霄深雲未許通冠蓋曲
徑何曾碍牧樵地湧冽泉飛海眼天開平野在山頭我來
領畧趙州意聞得清香渴已消

都門別余桂崑二首

銀燈斲接綺筵紅岐路天分拍顧中三晉雲山雙蠟展九

江烟水一歸篷

時桂岩有山右之遊

名場休戀觸蠻蝸識得歸舟即漢槎此去不須論得失相
逢煮酒問梅花

鶴源水

邑人徐文幹筠亭

修水支流合璿源源九宮一泓徹冬夏千畝溉南東月冷
魚吹浪秋高鶴舞風懷清憑飲啄仙馭入雲中

過修溪口

義寧州志

卷三十下

藝文詩

二百二十

芝臺館畔長菰蒲燕子屋前聽鷓鴣東去修溪如瓮口猶

傳黃氏舊粉榆

嶢巖山

邑人余芬桂崑

嶙峋插江浦阪折路難通翠滴千巖雨寒生萬壑風當關
橫一劍拔幟豎雙虹翹首雲移岫林深夕照空

過金雞洞

邑人袁珥念圃

深巖幽洞插江浦傳有金雞出銅鼓金雞一去幾何年長
留飛瀑晴翻雨壁懸精鍊絡藤蘿怪禽一聲山鬼舞孤雲
兩角摩清空絕磴欲攀猿猶阻峰頂遙送鐘聲來驚起山
家雞報午

遊清水巖次洪岷山韻

邑人萬鏞韻庚

造物森神奇幽怪豁山腹香風生近崖白雲起遶麓拆車

疑太行藏真想王屋馳慕二十年安得神鞭縮山靈驚我
來巖岫如結束夾路鳴翠禽迎杖走白鹿境幽地自清意
愜步能速南巖與北巖亂石如盆覆詭異不可名變幻交
人目或為怒鳥飛或為神獸伏或為生鉢蓮或為抵雀玉
或為筍之鎗或為棋之局平者如列屏直者如立竹峭壁
響飛泉靈源深蘊蓄積雪久成銀石乳結為菊草木無秋
冬元氣長肅穆內洞閉龍宮人間見天竺會須謝世緣披
襟此往復古時人已去題壁詩誰續轉瞬百年期萬事安
能足渴嚼苦瓜根饑餐甜菌肉就中趣味真可以慰幽獨
仙丹古難尋仙境今我屬君情知如何我身尚未卜惆悵
忽如癡夜就山僧宿夢與採芝翁高歌遊仙曲

小桃樹嶺途中口占

邑人胡鏞桐門

義寧州志

卷三十下

藝文詩

二 四百七十

城南二十里客路此經過山勢堆青嶂溪光皺綠波鵲營
高樹喜人傍小橋歌村店黃梁熟桃源竟若何

曉渡南厓

征鞍載夢走江頭隔岼山峰半出樓松影參天雲氣重霜
花滿地月光浮巖城柝響催殘漏蕭寺鐘聲送小舟伴我
遠行惟老僕長歌一曲付東流

過山谷墓

邑人余承烈介亭

流離幾度竄窮邦節概嶙峋未肯降遍訪詞翰到南渡別
開詩派衍西江蘇門四子賢誰並艾邑千秋井自雙石獸
雖存龍虎逝釣魚臺下水淙淙

六月十二日有持舊抄山谷內集注本來者鄱陽許尹
序及目錄題下注脚二頁皆在焉亟錄之詩以誌喜

學使 翁方綱 單溪

黃集無足本到今三百年明宏治刻本已闕詩譜繫於史非曰無

鄭箋茲集非仿毛亦弗傳流牽上言君父倫大義何炳然

下及漢以來作者數聯翩終於杜手取又不以言詮如我

意中事往泊橫浦船鬱孤氣崔巍飛翠下層巔大江浩揚

靈孰可拈於前十載無質處萬卷極丹鉛昨者官庫本欲

獲三注全任淵史容季温分寧出新刻留譜移舊編此事當聚合

不徒文字緣忠孝蓋天性其氣必開先塞乎天地間攝之

鯢桓淵壘簡有餘積昨夢屢回旋焉得南陔刊誰續寶劍

篇是日公生日神實式憑焉乙未滂乙酉人才曠接連七

百三十載過眼驚雲烟中間任史輩附驥名以傳同時得

後山南豐實先鞭亦如江梅詠益歎坡公賢昔人非好諛

義寧州志

卷三十下

藝文詩

二二 五百四十五

斯道乃仔肩區區詩派圖紫微苦雕鐫觀此兩葉註可以

衆說蠲徘徊公像旁再拜何由宣精神不於紙亦不於山

川小几爐炷香篆鏤蒸綿綿晚來大風雨忽作山響泉

六月十二日山谷先生生日拜像賦詩用乙未題正集

韻

敬讐三集注於今十二年鄙人無能役敢擬任史箋顧慙

茲辰逢每勞舊夢牽甲辰六月十二日自熱河歸於密雲旅舍夢先生其時正三集注本殿版

告成也高閣上摘星雲氣縷縷然髣髴大石出隱映霞裙翩

寤來尋文字自笑涉言詮異哉觀瀑圖落我江西船疇昔

津逮意陟遐敢窺巔分明換鐙書送筆卓我前惚恍中有

物非相非丹鉛逐境漸挹取稍稍測其全矧以胸次貯不

闕籐笈編空濛澹以訔艱哉若延緣蓋以真實義超出象

物先質厚為之本萬派洄一淵風騷萬萬古力挽大海旋
杜老衡霍語歐陽匡廬篇今我曷克任稽首神帛十笏
蘇齋筵兩公像接連雙井居况邇憑此辨香烟西江讀書
種心印儻獲傳玉京鶴先導金華羊後鞭先生井里側不
少篤生賢區區匠石手勉勉佛時肩得借牖知覺敢不勤
琢鐫故於公生日卜爾齋吉蠲拜疏每殘臘茲意曩未宣
神光皖公來千里合章川一點墨池雲蒸作兜羅綿借問
衆山響孰辨箏與泉

送定番李侯之任分寧并裝南昌使院補刻七佛偈識
語俾奉挂於文節祠中

三年匡廬面半榻谷園宿不及君此行直造修水屋匡廬
印皖山何減石牛谷瀑源聲不喧耶舍偈堪讀爾時扶護

義寧州志

卷三十下

藝文詩

三

四百八十五

歸一歡寒臘粥鶴銘書未殘鹿皮盟實續媿未持此意來
廬寒泉鞠逞者於黔中寓意借明叔見道頌重拈真實義
三復君自黔山來惠此分寧收殘珪補玉烟盥手寄新軸
未知古為師奚以厚所蓄為我堂几間敬致辨香告真氣
感江山風雨響梧竹經術即循良何區一私淑因之語達
泉谷園共著錄

重校黃詩有感四首

拜像焚香十二年又尋舊夢到江船摩挲雙井重鋟本宧
寐鄱陽一序前王父子畊文並在青神天社譜誰先知人
論世千秋事只是難追史會編

紫氣風迴大海瀾誰知古井不生湍障川浩浩俱東注返
景時時得內觀絕利一源憑戰勝默存萬象入寬安龐公

吸處尋初祖正自閒中着力難

新津妙悟本拈花薌室燈光自世家
笛鶴幾年驂玉局石羊他日叱金華
爐成九轉丹留火江折三紋篆印沙
昨剔劈窠書偈子一峰廬阜倚殘霞

摩圍返棹即鄉關
皖口清迴一氣環
中有性情皆學問
後來靈秀祝江山
瓣香日日如親炙
握麩區區實汗顏
帳望南州翹傑士
船窓杳靄碧雲間

題黃文節公石刻像後

有序

大司成法式善

梧門柏山

嘉慶庚申十二月十九日蘇齋拜東坡公生日適得黃小松札以蘇像冊屬撫文節像坐中高玉階摹寄翁覃溪先生書公自贊似僧有髮似俗無塵作夢中夢見身外身四語於後小松勒石徵詩

義寧州志

卷三十下

藝文詩

二四 四百七十

蘇齋前歲拜坡公雍容壁上瞻
涪翁刺史書來索翁像高生
寫出神采王寒巖鐫字題欸
詳涪翁精氣山同長紙光墨
影起寒綠燈下摩挲遠懷觸
翁昔橐筆偕坡仙玉堂儔侶
割三年端明學士忽出守翁
亦倉皇江上走蘇公儋州翁
黔州題詩各寫生平憂轉瞬
已逾七百載同堂二老風流
在明月忽破松陰來清磬一
聲梅花開山僧一瓢清酒薦
身外有身苦不見翁今真箇
夢中人衣冠濯濯秋無塵白
雲畢竟歸何處我欲從翁看
雲去

詩龕題黃山谷像

公嘗自題像謂是有髮僧將以不二法而參無上乘世却傳公貌宛然王右丞

次韻山谷清水巖詩

邑人萬承風

和圃

巨靈剖山腹便便極精好造設想盤媧歲月無稽考楞然
當谷口龍門乃天竈鐘鼓發清越俗韻從茲掃
巖泉混混清巖樹亭亭好有本者如斯此理宜參考雪堆
種玉田雲封煮藥竈至今石上塵誰為讀書掃
南巖極高明壯巖更靜好人每軒輊之或者未經考隱見
各有宜誰與而誰竈幽窟倘能尋不憚燃炬掃
躡屐時一來吟詩艱得好拂石尋舊題剝落半可考山籟
度青林炊烟生晚竈何年為閉關就中長却掃

冬日消寒會以山谷銅雀瓦硯索題諸公皆有長句用
次胡雪蕉水部韻答謝

諸公藻思艷於霞千片乃能題我山谷先生之舊硯詞源
浩淼湧風泉句法堅凝歸冶鍊此物沉晦幾何時今日復

義寧州志

卷三十下

藝文詩

二五

五百五十五

為開生面晴窓展硯讀新詩墨花文采交相絢自非有筆
大如椽坐令陶泓失紀傳先生平生鍊石心百折不回恒
苦吟君不見當年竄逐嘆漂淪進食誰復哀王孫襍被倉
皇走熨道更冒瘴癘投海濱任運堂前餘槁木喧寂齋中
無故人熒熒一身饑且死焚香晏坐看行雲信史詎誣祖
宗烈塔記乃忤燕雀羣文字賈禍如此極交遊驚駭淚欲
吞何如先生胸中有浩氣寄意手寫東都文先生宜州嘗為人寫孟
博傳蓋以三徙流離十一載先生五十一歲謫黔州始自
自况也黔戎終嶺海未知了身萬里時此時此瓦竟安在當其得
志侍紫霄揮毫直欲驅元宰案頭日日磨松烟蠻溪大硯
無光采先生有蠻溪大硯磨松烟之句只今載讀先生詩餽贈更有少監
詞先生集有次韻李純少監惠硯詩水蒼珪玉道人刻寶泓聞自外家貽

集中有和公擇舅氏送呂道人硯長韻詩萬州金崖尤奇特桂林剝腹便攜持

集中有金崖硯說廬州桂林石硯說凡此皆為先生几席珍異囊到處喜相

隨胡為一朝俱零落化作浮槎舞蛟螭獨留此瓦未磨滅

至今濡染浮輕漪兵燹頻仍六十紀主者幾人研踰麋其

間英才亦輩出何乃未聞一洩其精奇從知顯晦有定數

此恥終當湔滌之今日硯為賤子有喜以名齋意孔厚

硯因有古瓦山房額摩挲欲洗此君顏潤色特委諸公手維時皓月

照空梁啟櫝高歌共舉觴憶昔元祐開皇極中天坡谷兩

擅場後生豈敢阿所好竊附漁洋一炷香

魚洋山人有辨香只下涪翁拜宗派西江第

往手澤長何異合浦還夜光置之篋笥騰寒芒願將清話

續玉堂嗚呼願將清話續玉堂安得有如先生瑰瑋絕妙

義寧州志

卷三十下

藝文詩

二六 五百一十

之文章

題沈石田評硯圖即用題中自題莫斫銅雀硯歌原韻

溺情子墨非好弄一甕珍與百朋重陶模况勒建安年猶

令後世知漢統片瓦流傳春復秋誰其圖者明沈周

重華拜

賜親捧出張壁灑我寒陋羞山房舊有涪翁硯省圖似識故

侯面詩題莫斫義實嚴存之忽惹阿瞞怨三臺歌舞信不

臣跡非在瓦乃在人瓦兮瓦兮汝無罪寶茲完璧毋使碎

是圖為 內府物嘉慶丙寅新正四日

重華宮聯句承風忝與佳宴特蒙

賞賚拜

賜諦觀筆致閑雅詩歌尤峭拔有奇氣自為石田真蹟

承風廿年前曾得山谷瓦硯喜而名齋並拓本為記質
之當時賢達多有題詠茲復得此頓互相照映荷新恩
之優渥增舊物之光輝敢不什襲珍藏永為山房世寶
因勉和圖中長歌一首用誌翰墨之緣以寓感激欣幸
之忱云

臨洛關懷古

雉堞崔巍古洛州水清沙白繞關流當年賢守王文叔姓

字惟從斷壁留余有山谷銅雀硯跋云艾城王文叔為洛

爵里其缺
漏如此

登靈石峰

邑人榮錫楷魯嶠

造物揮神斧雲根巧劈鐫巖空僧結寺壁峭客登天樹色
縈嵐翠鐘聲破暮烟怪他香火盛知有法華仙

義寧州志

卷三十下

藝文詩

二十七 四百十

烏石溪橋

十里清流碧平鋪鴈齒齊窺汀開一面晶鏡夾雙溪望遠
山如畫吟來柱欲題捲簾新翠擁人在柳橋西

旌陽得日觀懷古

一峰高聳暮烟蒼絕頂空留古道場雨洗仙壇丹竈冷風
銷石靖劍池荒攀蘿日落孤筇外掃徑雲生萬壑傍惟愛
瀛溪光霽好遺踪猶說許旌陽

過上坑嶺值雪

時丙午三
月三日

鳥道高從絕頂盤片時風送雪漫漫天邊絮舞春三月樹
裏花堆玉一團古寺爐烟當午靜空山雲氣逼人寒艾城
咫尺誰修禊料得流觴曲水難

重陽日偕邑人士登南山厓訪古塔基

知州陸模孫遠亭婁水

翠微層疊鎖修江石上濤聲雪捲瀧城郭千家環欲抱風烟百里鬱難降可無巨麗占形勝應藉觀瞻壯大邦地運人文兩相值會看霄漢湧高幢

下車雅志樹風聲揚激須分濁與清欲以廢興為已任敢言動作合民情後車未有賓朋載出郭欣看父老迎漫詡登高能作賦九秋雲物莫空橫

寂寞山河閱宋唐尊前感慨起蒼茫雁飛誰聽摩訶薩梵

昔有加藍依小乘食三淨食者雁犢鹿也一日見雁飛輒曰衆僧闕宮摩訶薩埵宜如華言好施也一雁應聲而墮衆曰此雁垂戒宜旌彼息因鈴語難聞替戾岡晉書云劉建塔瘞雁雁塔之名由此陽石勒將救之佛圖澄曰相輪鈴音云秀支替戾岡僕谷劬禿當言軍出當得劉曜也四面晴峰開

亥市百年佳節屬重陽摩挲一片平臺石影現金繩百尺

義寧州志

卷三十下

藝文詩

六 五百二十五

長

輿論先從士論乎簪裾陌上競來趨空巖列坐停樵牧深院傳觴入畫圖五色文章騰彩鳳雙清心蹟映冰壺諸公相與搜風雅共鬪陽春調不孤

過澗水宿梅溪別業

知州賀維錦撫芸丹陽

攬轡來從古艾邦山川清響玉琤琮龍峰西峙開吳甸澗水南流入楚江似掌原田雲覆隴等身書史月臨窓梅溪竟夕評花事隔里僧鐘繞夢撞詰朝擬遊黃龍寺

癸亥重陽日陪陸刺史遠亭及諸同志議修文峰塔宴

集南厓次學正黃對華原韻

邑人查承瑛澹軒

文星與德星一氣光聯屬九日登南厓羣賢鏘佩玉旋憶去年春尋幽到空谷拍點古塔基宛在山之麓文峰插其

巔崢嶸雲漢觸靈秀鯁前哲屈指難更僕風雨摧何年荆
榛披繁縟吊古發浩歌滿山紅躑躅抵今議重修雲龍上
下逐秋色蒼然來香風起巖菊登陟倚山隈川原紆駭矚
層巒四面開烟靄洗晴旭塔位宜巽方高拱收全局指南
從此定山靈宛相告仰惟陸浚儀勤民清案牘宴飲溪山
樓劇談掃煩促夾道護藤蘿菁葱映棧樸多士慶栽培大
雅歸陶淑同寅畫協恭佐理昭雍穆咳唾珠玉飛盛事振
頽俗佇看宰堵坡天半雲章續人文觀化成光凌鄴侯軸

山谷釣臺

閒却經綸手崖前理釣鈎浮沉空世網得失付波流斷岸
殘碑在長江皓月留先生非隱者底事戀滄洲

旌陽劍池

義寧州志

卷三十下

藝文詩

二九

四百五十五

西江思禹德忠孝老神仙仗劍磨秋水擒蛟化白蓮青虹
光不斷碧澗影相牽永憶旌陽令靈真蹟儼然

黃龍法窟

純陽曾變幻禪窟啟三關參透黃龍法願求寶劍還靈源
源水曲亭桂桂花斑一鶴凌秋碧瓊田紫氣環

送州司馬楊蔭軒陞任鶴峰州

分寧佐化久稱賢臺府交章薦特遷橐筆春風移楚地懷
人湘水隔吳天庭留花木棠遺蔭興寄溪山玉化烟從此
琴堂虛絳帳忍看騎鶴下滸川

遊清水巖和山谷先生韻

邑人 李際春 梅窓

吾聞天下勝造化鑪錘好千年瑤筍茁試從瓊笈考滄桑
幾變更劫灰留仙竈重當躡謝屐蒼蘚不待掃

靈巖如覆盞來遊果明好玉田誰與畊石鼓誰與考一滴
汲清泉雲腴烹丹竈細和涪翁詩俗氛從茲掃

祥雲山瀑布

峯高六月寒飛瀑瀉雲端浪打花千疊波翻雪一團松鱗
磨玉爪珠影走冰盤呪得龍歸鉢山僧法海安

修水行為李虛岬刺史賦

進士王

模仁圃
金谿

榜人且弭節祖席且停觴使君修水去為歌修水行修水
六百六川路一何長泝源發吳艾分流入楚湘東連昌邑
國西接羅子鄉查田鱸其膾上繚楹其吭封疆殊險濶藪
澤氣蒼蒼龍湫合風雨溫泉劇熱湯川留郭璞識山記葛
洪章侍中開風俗太史靖邊防名士黃魯直仙人許旌陽
詩演紫微派丹傳大洞方先賢知有錄方物志難詳村烟

義寧州志

卷三十下

藝文詩

三十 五百

環亥市城郭占坪岡支支收稅富井井汲泉香有茶高日
鑄有花雜都梁林棲連理瑞野播瓊田芳妖氛掃牛吼災
稷變儵魴民風最淳厚民氣自樂康况聞使君化洋溢在
盱江盱江與修水一葦尚可杭修水長無極謳吟總未央

抱子崖歌

修江自東注而我獨西來遙見一片石言是抱子岬大者
如老姆其小若嬰孩俯仰相偎傍若吮乳在懷誕置修水
上依稀得形骸飄風野火不能泐流沙息壤不能埋行人
指點空悵望山靈擁護亦奇哉我來初生魄維舟在崖側
憑眺思渺茫懷古意交迫聞昔望夫山又有開母石石破
自壯方生子於陽翟石真能生子此理安可格區區抱子
崖並非有血脉想是女媧煉五色補蒼天零落人間變化

多奇跡遂遣頑石作女岐不用牛即當七夕虛谷元牝相
網緼萬有同胞共生息天漿為乳泉為臍到今石崖多津
液吁嗟崖石將奈何古來鑿死混沌多爾乃變形為山鬼
披薜荔兮帶女蘿既不舍睇又不笑但見雙手顰抱兒腰
相撫摩倒影在清波一抹鏡新磨紅顏已宣髮終古感雙
蛾風雨其晦日月如梭誰為爾泣誰為爾歌我欲憑雲梯
躡虹磴摩苔剔蘚篆鳥書蝌云是汝上老人來借爾作韓
陵一片石千秋此山阿

寧州八咏

吳公子慶忌

越王勾踐沼吳時公子出亡正在茲宰嚭未曾膏厲鏤靈
胥先已革鴟夷滿腔熱血憑誰灑一綫英風儘獨吹莫向

義寧州志

卷三十下

藝文詩

三二 四百四十

查田頻仰望

路史注云查田即古艾邑

里人枉欲殺要離

吳有兩慶忌要離所刺乃

王僚子在

楚三閭大夫屈原

欲問離騷事若何黃龍山下有餘波

汨羅水源出此

招魂氣已沉

湘沅競渡聲還過汨羅路接平江桑梓近風移清水蕙蘭
多投書帛纍憑揚賈痛飲惟應讀九歌

漢劉侍中陵

廟貌千秋屬侍中南州人傑幾稱雄莫誇獨坐鄧馮翊尚
許干城何仲弓水自東流多間氣鄉從西去有餘風當年
未解陳蕃榻獨闢蠡叢路已通

侍中和帝時人在孺子前

吳都尉太史慈

將軍義勇鳴三國保障屹然鎮此方幕阜營高窺赤壁上

僚壘固接柴桑景昇豚犬徒奔走孟德虎狼且斂藏千載
英靈原不死至今樵採絕沙場通志載慈墓在建昌縣

晉西安令吳猛

旌陽已獨踞仙壇折節還傳大洞丹江水濤深羽扇溼石
梁澗險玉漿寒神明信爾由忠孝藝術居然上史官好問
東津尋舊宅地有丹霞觀為猛舊宅庭幃溫清想承歡

宋周元公

洙泗淵源派孔顏濂溪一脉更潺潺暫留鴻爪非無處小
試牛刀在此間太極圖開天地秘通書道演聖賢關猶將
霽月光風意一任紫陽與象山朱子不肯為人作此四字象山書之云人人有此光風霽月

宋黃文節公

義寧州志

卷三十下

藝文詩

三二

四百四十

由來江夏無雙士又作南州第一家氣節有官皆坎壈文
章何句不精華徐洪並出誰高足四洪徐府皆山谷甥觀耒同門悉
後車還把菁英分草木爭傳雙井白毫茶

宋徐尚書府

當日僉邪皆誤國先生奮髯叱長奴一門忠節憑孤立千
載綱常賴力扶直道原來師柳下師川詩直道庶幾師柳下不應四海獨詩名
高風久已屬東湖詩名四海猶餘事也入紫薇宗派圖

清水巖次山谷韻

州學

黃文節

對華臨川

清水闢靈巖萬吻一詞好開鑿自何年其事弗深考曠輿
天造奇真仙丹埋竈一時乘興來巖扉風已掃

銅鼓城

石壁參差面面奇將軍橫槊漫留題墨鋟山骨雲凝篆劍

閃靈光玉切泥不為岐陽留獵碣豈緣諸葛聽軍聲健兒
無數調鷹犬落日山腰更射麋

雨中舟過抱子石

石如仙子凌波出人逐秋鴻帶雨來卿若有情應笑我阿
娘前度倒綳孩

鳳巖朝陽

州訓 王朝瑞 式臺
萬年

苞鳳儀修水丹霞繞霽晨半空巒影轟五色曙光勻楚尾
聯芳甸吳味報早春鷓鴣齊振翼彩煥十分新

犀津夜月

山光搖淨練晃朗結層冰豈有靈犀照而兼皓魄激涵秋
波激灑蕩壁影飛騰更愛輕帆渡星梭織一稜

瀛溪書院

義寧州志

卷三十下

藝文詩

三三

三百八

從師猶宦學風月喜公同窓草舍生意池蓮妙化工孔顏
尋樂處心性畫圖中長幸宮牆近薪傳在洛東

山谷釣臺

溪吟初醉後兀坐且垂釣笠釣傳雙井詩名播九州半灣
明月棹一角荻花洲竿拂珊瑚樹凭虛好放眸

清水巖

邑人 陳懋敬 止臣

書臺闢星牖仙巖戶不扃雪田含乳白石筍挂苔青清泉
閒激戶雜花初滿亭我欲問詩派千古水泠泠

犀津渡口

舊是犀牛渡津衢偶得名千艘橫極浦四水合州城沙帶
金星燦波涵石月熒巍然太史第遺跡尚分明

梅山寺

邑人 張問行 雲轂

一峯佳勝處上結古招提院僻風鈴語山空梵唄迷梅花
開曲徑楓葉落幽蹊烟外停雙屐苔痕覓舊題

丹霞觀

紫雲洞府吳仙宅尚有千年老豫章曾讀晉書欽至孝真
人原不外倫常

前代鄉先輩如黃文節周康惠諸公詩原不勝載特登
其有繫邑之風土人物山川古蹟者前代名宦詩亦如
之

國朝作者輩出聊據遺稿採錄而現在者例不入志茲另
錄曾刺史霽峰李別駕介山詩留為甘棠並附邑人數
詩於后以備採風

艾城官舍漫興

知州曾暉春

落花滿地放衙初簾影垂階散吏胥茗椀清分雙井水芸
軒富擁百城書連窓燈火魚更靜繞院吟聲鶴夢舒十丈
紅塵飛不到閉門權當子雲居

鳳嚳朝暾排闥來碧梧修竹慰新栽十年樹木關心遠一
縣看花苦意培過雨暗催梅子熟番風莫問海棠開左思
紙價江淹筆射斗文光燭上台

衙齋傳舍寄閒身團聚槐柯亦夙因但使父書還可讀定
知官橐不嫌貧馬憐齒老途能識蠶到聲喧筆有神一樣
池塘青草盡瀛洲連轡又何人

詩禮親承手一編傳家片席是寒氊蹉跎馬帳慵書日鹵
莽螭坳射策年薄宦味真雞肋戀公庭訟息鼠牙穿秧
畝匝地催耕起未敢芸田轉舍田

九日借周雨亭刺史范潤齋司馬黃對華王式臺兩學

博登南厓

州判李光珽滇介山

九日南厓歲一經七年前已寫丹青

子曾繪修江晚鈞小照琴彈山

水來仙吏筆掃風雲待酒星雅集詩章徵故事

壁有許刺史舊作

高懷萸佩引遐齡

對華式臺俱年近古稀

相將撥石披雲上擬補峯

巔舊日亭

憑虛樓閣枕巖隈水檻晴窓四面開白鳳初涵霜後影黃

花共醉掌中杯雲封翰墨涪翁去

寺存順濟龍王廟碑

風送絃歌茂

叔來

東門外瀟溪書院可望見

更向蓮池看霽月

署有愛蓮池

招邀仙侶下

瑤臺

龍潭

邑人胡濬源乙燈

我聞炭谷龍湫遠在終南山唐時龍移天昏地黑一已艱

義寧州志

卷三十下

藝文詩

三五

五百一十

不知何年數千里南來又復飛移到此間此間千丈深窅

窳勝彼牛蹄一掬潺湲源自東怒西走雕鷹絕壁鎖重關

上流白石束兩坎若井若甕若閘閑懸濤濺沫湧雹雪奔

騰駛鬪湍迴環崖崩石破青山動電駭霆轟白日翻疑通

尾間穿地軸下引沸海相往還鮫人瑟縮不敢沒支祈跳

躑不能攀魚鱉戢戢駢退伏儼如額點呂梁灣登臨俯瞰

毛髮豎慄慄有神非陰姦龍潛其中睡長足穩抱驪珠氣

接百千萬道晴虹斑有時蘊隆金石流鄉人乞雨殷禱求

巫師投牒跪拜咒赤蛇黑龜紛出浮蒸蒸雲起漫空布頃

刻滂沱四境周又時天開景清霽潭中濁浪高山邱瞥訝

洗潭吁可怪垢污能自勤滌搜上有叢祠神一氣山川精

靈嶽瀆傳出雲降雨同功德奇勝豈徒誇玩遊吁嗟龍真

宜王神宜帝呼吸感應皆民休詩成彷彿能吟和乍聽聲
響出龍湫

次韻黃對華銅鼓城

一卷自裂狀神奇偶值將軍巧品題劈匪劍鋒原是筆靈
疑山骨化成泥何須元凱峴峯碣已當武侯融水輦此石
誰人能破的君其一失麗龜麕

是地疇曾切已饑曩聞昏墊急然眉如今犖嶮還腴壤每
日菟苗逸健兒泖滌溫泉滌候館蒼葱新稼繞茅茨師儒
有意闢民瘼早媿東山挾妓時

抱子石

巖石寧曾解惠慈居然抱子立江湄天成保赤留真像敢
告新來父母知

義寧州志

卷三十下

藝文詩

三六

四百一十

黃龍山

邑人冷玉光芝田

龍峯何岩堯西北亘吳楚桓山與之齊兩兩相毗輔南望
青龍低東瞰艾城古瑞竹抽丹崖瓊草茁元圃種種上仙
葯圖經弗及數黃魚伏靈湫白晝致風雨歛然漫萬山郊
原潤禾黍茫茫神仙窟丹成遺白杵礪深春積雪凝幽夏
無暑霜嚴百草枯野火驅貔虎山毗結茅屋土與懷葛伍
會當躡鱗鬚攀蘿試延佇白雲起足下清風生卓午層巔
探禹碑綠字証岫嶠

古鐘歌

睇澤雕鐘不可見豐山九耳亦希聞兩樂尚傳鳧氏制金
奏為能感神人此鐘鑄成歷年久鍊金千鈞期不朽不窳
不槲和於物大鳴小鳴隨所扣淒涼古屋塵土封寂寞空

山沒瓊玖年來無人一拭拂遂令洪聲避甕在何不縣之
清廟明堂間蒲牢大吼徹雲山嗶嗶厥聲和且平天子聽
之一開顏虎章作鏤非所羨要將雅秦振人寰自從歲月
淪此地鍾呂何惜尋常棄虛業不設縣楹檐碧玉浮金未
為貴古來貴賤亦何常高高下下唯所置君不聞龍泉太
阿韞其實伊誰達識事幽討牛斗之間看紫氣夜夜寒芒
騰蒼昊又不聞周宣石鼓史籀書鴻文應須大厦儲當其
風雨遭摧剝牧童敲火牛礪角

牧童行

層山落日掩齋扉炎風侵我有餘威黃犢穿徑齧短草牧
童相隨夜不歸却立路隅心癩暑科頭赤脚身無衣冷齋
了無事憇暑齋外坡借問牧牛兒生事能幾何我本結茅

義寧州志

卷三十下

藝文詩

三七 四百七十

旌陽側終日扃門門無客阿兄鋤禾東郊東阿翁灌薯北
山壯去年番薯大如斗能供一家四五口今年番薯大如
錐一月饗殮不可支五日天不雨草枯土燥牛無芻十日
天不雨賣牛西鄰去了租為聞此語意愴然此外疾苦未
暇詰一州之大數萬家仰食諸積十之七鄙人搔首問蒼
蒼思欲濟旱苦無術仰看雲漢案戶長繁星皎皎爛生光
瞬息黑雲似墨起天半牧童緩歌騎牛過壠畔

濂山書院

兩賢講學斗山尊俎豆同堂道脉存北宋儒宗獨開闢西
江詩派共淵源蓮華定不染泥滓梅實終然留本根唯有
涪翁識光霽千秋臭味此中論

雙井懷古

明月灣前石磴斜山行迴繞水之涯邱壑漫數棠梨落亭
榭空教薜荔遮篁竹春生誰况筍原泉秋注意烹茶釣磔
莫辨銀鈎字閒看溪邊鳥篆沙

抱子石

擁著嬰孩未肯離石形千載此河湄裙拖浪穀成三折髻
插山華任四時慈母如斯勤鬻子老娘安有倒縵兒尋常
閱盡風霜苦要識貞心不轉移

五里均望鷄鳴峯

邑人查望洋漁贊

連山森矛戟雄長環相爭天外一峯來化作天鷄鳴一鳴
萬峰低再鳴萬峰驚如戰降肉袒如晉主夏盟銳如古弼
頭筆公呼欲鷹秀如蛾眉女犀潭鑑影清其下乳泉碧淪
茗浮花輕惜遺又新記思補鴻漸經往日隨樵子芒履穿
雲行羊腸屢迴轉鳥道紆縱橫有似著文家千曲無一平
撫懷怡舊陟攬景回新情望望籃輿中江水隔盈盈

幕阜山懷古

黃龍之山如飛龍天矯蜿蜒蟠青空巨靈震怒擘左臂擲
作撐天幕阜峰幕阜翠板黃龍起俯瞰修江六百里脉接
岷衡走匡廬氣捲吳味掉楚尾聞昔神禹奠洪濤洞天銘
刻昆吾刀曰民艱哉藪蛇龍咨爾童律驅勤勞薤披蚪
伏百怪至今夜夜山靈號字奇語奧同响螻沐日浴月蒼
厓高三千年後遺聞墜御寇尚傳吳都尉二十四氣福德
鄉嘉名付與葛洪記旌陽九轉煉神丹木客山都拜星壇
芙蓉池厲斬蛟劍金鯉騰波淬劍寒我來正值清秋節芒
屨上踏峯頭雪仙人洞尋海棠香紫清觀采瓊田潔樵風

扶上繫舟峯杖底片片飛霞結兜羅綿裏望洞庭一杯湖
光鏡澄徹此身不知有塵寰瑤草松花好注顏滙沙池邊
一濯足掃壇竹子挑雲還欲搜奇書古嶽瀆夕陽亂射西
南山

文峯塔落成登絕頂放歌

八萬四千阿育塔誰移七級修江來明照四方離為火光
天燭地文華開經唐歷宋元明一千載今朝突兀見此小
蓬萊我來御風凌絕頂萬峯俯視嬉嬰孩尻車神馬馳八
極嘯聲一落驚春雷大羅天外摩巨刃摘取繁星佐金壘
飛身偶欲驂鸞去上界羣仙拍手哈儒生意氣冲霄漢不
封萬戶終廢材撫靈裾秀仗人力此事頗覺費疑猜博攷
朱彘可談徐筠志鄧書燕說理難推或云題名肇雁塔或

義寧州志

卷三十下

藝文詩

三九 三百八

云現影應葭灰我意不如讀破萬卷揮神筆峩峩山斗入
低徊氣吐虹霓發奇采光芒直奪文昌魁轉憶積銖累黍
日經營慘淡均雄才此峯要勝龍文鼎力扶運會挽衰頽
邱陵學山爭一簣默毓潛鍾養靈胎四十門蟠鈴替戾鷗
程九萬接崔嵬登陟聯翩蟻旋磨熙熙歌笑臨春臺擬把
文峯作筆天作紙二十八宿雜披錦文回